

Merikizedheki Uyu Ndiani?

Jeffersonville, Indiana, USA

65-0221E

1 Ngatikotamisei misoro yedu tinamate. Baba VeDenga Vanodikanwa, tinonzwa rwiyo urwu "Tenda Chete," rwunoita kuti tizive kuti ndizvo zvoga zvatinofanira kuita kuti titore nhaka yevimbiso DzaMwari, kungotenda madziri. Nekuti zvakanyorwa zvichinzi, "Zvinhu zvose zvinogoneka kune vanotenda." Tichichema kudai, sezvakaita murume uya aiva nomwana airwara nepfari achiti, "Ishe, ndinotenda! Batsirai Imi kusatenda kwangu."

Tinokutendai Imi nokuda kwesimba Renyu guru, nokuda kwokuzarurwa Kwenyu kukuru muzuva rino rokupedzisira. Zvinoita kuti moyo yedu ive nokufara kukuru uye ive nomufaro, kuziva kuti tapinda muhochekoche NaMwari Anorarama; Anozviratidza imo munyama chaimo, humbowo hunobatika, sokuta Kwake mumazuva akapfuura, uyewo sokuvimbisa KwaAkaita mumazuva ano okugumisira. Tinokutendai zvakanyanya, Mwari wedu. Zuva rino apo zvinoratidza sokuti munhu hachazivi nzira yokutora, tinemufaro mukuru kuti isu takawana nzvimbo yakachengeteka, yokuhwanda.

Zvino mutiropafadze Manheru ano, Ishe, zvatinenge totaura Shoko Renyu. Uyewo vimbiso dzatakapiwa, dai tagona kudzibata zvakanaka mumoyo yedu, tadzikoshesa nokuremekedza kwose, uye tadziteerera nokuzvidzora chaiko kune HuMwari. Nekuti tinozvikumbira MuZita RaJesu. Ameni.

2 [Mumwe munhu anotaura naHama Branham-Ed.] Mupiro worudo? Vanga vasingafaniri-vanga vasingafaniri ku-kudaro. Ndiani azviita? Ndimi munemhosva? Zvino ndanga ndichitsura mukuru wokufambiswa kwezvinhu. Andiudza kuti atoreri ini mupiro worudo. Anga asingafaniri kudaro. Ndinotenda zvikuru, Mwari Anozviziva izvi, asi Ini-ini handina kuuyira izvozvo. Ndinokutendai. Ishe Akeuropafadzei. Ndichazama napose pandinokwanisa. Ndichiisa kushumiro dzokunze, kuti ndive nechokwadi chokuti yaita basa roHumambo HwaMwari. Uye kana Ishe Achitendera, ndichaitora, pachangu, ndoenda nayo mhiri, kundozadzisa Ivhangeri imwecheteyo yamagarira, nokuteerera muvhiki ino, ipapo ndichaziva kuti zvaitwa nenzia yamunoZvitenda nayo. Ishe Andibatsire ndigozozviita.

Ndinotenda zvikuru nokuya muuwandu vhiki ino, uye nokuda kwenyu vanhu mose varikutinzwa panhare zvakare Manheru ano. Tinotenda zvikuru umwe neumwe wenyu.

3 Billy ati kwandiri mangwanani ano, iye ati, "Baba, dai manga maya neni mangwanani anhasi, mangwanai-ngwanani, zuva richamgobva kubuda, uye mamira neni kunze uko uye maona vanamai vachimwisa vana vari mudzimota, vanhu ava vanonzwsa tsitsi vagere mumvura inonaya, vakamirira kuti masuwo azarurwe!" Munoona kuti ndingazova munyengeri akadii kana ndikazokuudzai chimwe chinhu chisiri Chokwadi? Ndinozova munhu akaipa kwazvo. Dzimwe nguva ndinofanira krwadzisa, asi haisi nyaya yokuti ndinoda kudaro, inyaya yokuti . . . handisini ndinorwadzisa. Ichokwadi Chinorwadza. Uye ini-ini . . . Asi ndinotenda kuti ndicho chikonzero maya pano, nekuda kwekuti ndine kurevesa kukuru nemi, uye ndinozama nokukanisa kwangu kwose kuti ndikubatsirei. Ishe Abatsire umwe neumwe wenyu.

4 Uye iyezvino ndinoda kutenda mose vanhu noku-nokubatira pamwechete, imi vanhu veguta rino, uyewo, imi makatipa, makatitdere kuti tigowana nzvimbo ino yechikoro yokurendha, chivakwa chino chokusanganira uye nenzyimbo ino yokuitira zvinopa muviri kugwinya. Uye ndinoda kutenda vakuru vacho kana varipo pano. Uyewo ndinoda kutenda Houston Colvin, anova mutariri wapano, mukubatira kwake pamwe nesu achitibatsira kuwana nzvimbo ino uye nokuva nesu husiku hwoga-hwoga.

Tinotendawo mapurisa emuno muJeffersonville nokuya kwavo uye vachitarira, nemutengo wakaderera kwazvo. Ndinofunga varikutinbhadarisa madhora maviri paawa imwechete, mukuti mapurisa akatoiswa pano nokuda kwebasa irori bedzi, rokuronga mamiriro edzimota, nokuonawo kuti hapana . . . hapana chingazoitika, uyewo nekuona kuti zvime zvose zvakaringana here. Tinotenda vanhu nokuda kwazvo. Uyewo naiye-naiye, zvakare, mutekenyi aripano pane-pane zvinoda magetsi, ndamucherechedzawo. Uyewo navamwe vose vaanoshandidzana navo, tinotenda zvikuru.

5 Ndinotenda umwe neumwe wenyu nokuda kwezvipo zvenyu. Billy achangobva mukundiunzira, masikati ano, chi-chipo, zvhati wandei zvazvo, uye namabhokisi, zviwitsi, uye nezvimwe. Uye chimwe chezvipo izvi changa chiri-chiripamusoro peMaropafadzo akarehwa NaJesu, chine mufananidzo WaKristu pachi-pachiri, iyo Mharidzo Yake Yepagomo. Uye chakaisvo naka zvikuru. Ndinokutendai zvirokwazvo. Uye nezvinhu zvakangowanda, handizivi kuti ndokutendai sei nokuda kwaizvozvo. Uyewo, zvakare, nemideme mideme yenyu, kuisa kwenyu mari mumusangano, tinozvitenda zvikuru, nemoyo yedu yose. Ishe Aropafadze umwe neumwe wenyu, zvikuru.

Billy ati iye, vanhu vakawanda, manga muchikumbira nhaurirano dzehuso kuhuso munguva ino. Uye vakawanda vazvikumbira uye kune vane vana vanoda kukumikidzwa. Oh, ndinoshuvira sei kuita sokudaro!

Asi, munona, pandakauya rwendo rwuno, zvinotora kunya tsvo zvipira. Ndinongofanira kugara imomo, nguvadzose, imomo mukuverenga zviripedo, Iro Shoko uye nokugara mumunamato, kuti ndigone kuzounza Mharidzo Idzi. Mazviona, hadzisi dze . . . Ndedze chiero chinopfuirira chamazuva ose kwatiri, nekuti tinenge tichitsvaga kuda KwaMwari pazvinhu uye tozovitaura. Uye zvose zvinofanira kuuya

pamwechete, uye nokubvunza Mwari yandinofanira kuzarura.

6 Zvino, Ishe Achitendera, tinodzokazve munguva pfupi-pfupi, kana tichinge tangowana zuva. Ndakanakapa chitaurywa chokufano zivisa, kana kuti-kuti ndakataura chimwe chinhu pamusoro penguva yeEaster. Ndinofanira kuzviongorora izvi, nokuti ndinofunga kuti ndinenge ndiine basa kuCarlifonia munguva dzimwechetedzo. Saka ndinogona kunge ndakanganisa. Zvisinei hazvo, patinodzoka zvakare kutebhanakere,tichatumira chiziviso, uye kereke, uye-uye-uye inozokupai mu-musi nenguva dzacho. Ipapo ini, zvichida panguva imwecheteyo, zvakare . . .

Handina kumbotsaurira nguva kuitira kunamatira varware. Hatina shumiro imwechete zvayo yataunza vanhu kuno uye ndokuvanamatira. Tanga tichivarega vachienda. Uye hama dzedu dzanga dzichiparidza, Hama Lee Vayle neHama . . . Dzimwe hama dzose dzanga dzichiparidza, uye nokunamatira vanorwara, uye nokubhabhatidza nemvura, kubhabhatidza, ndanga ndichida kudaro, uye vachindirega ndirovedzere PaShoko. Tinotenda varume ivava. Vaita basa guru kwazvo.

7 Pane shamwari zhinji pano dzandingada kuonana nadzo. Ndotarira zasi uko ndoona Johna naEarl. Uye havano Chiremba Lee Vayle, umwe wevatungamirira vekurongwa kwemisangano ino. Hama Roy Borders. Varume ava, handina kutombowana . . . Handina kumbowana mukana navo ungadarika kukwazisana maoko bedzi. Handina kutowana mukan wacho. Ndinofunga zveshamwari dzangu dzinobva Kentucky, uye nedzemuno, uye neshamwari dzangu dzinoshumira, ndinoshuvira sei kuvakwazisawo ruoko! Hama Blair, ndakavaona pano rimwe zuva radariaka. Uye navazhinji vavarume ava vandi-vandinoda, uye vakauya kumisanngano yakati kuti, uye handina kutowana mukana zvavo wokukwazisa ruoko rwavo. Ndiri-ndirikuedza kudaro . . . Havirevi kuti handidi kuita saizvozvo; inyaya yekuti handina mukana bedzi wekudaro, uye ndinenge ndichingo mhanya-mhanya.

8 Iri nyaya yokukumikidza vana, hongu. Mwanakomana wangu chaiye, kamuzukuru komana kangu ndaifanira kukakumikidza pamusangano uno. Handina kugona kuwana mukana wokuti ndidaro; Dhavidi muduku uyo. Ndavasekuru, kuvaviri zvino. Saka, Changamire May, kana varipano Manheru anhasi, vakandipa mudonzvo uya, zvinoratidza sokunge ndinofanira kudonzva nawo manje-manje.

Saka, ndakaudza Billy, ndikati, "Bhaibheri rakati berekanai uye muzadze nyika, asi mutoro wacho wose hauna kupiwa iwe woga." Uye vazukuru ava varikuuya nokukasika.

Uyewo, murangarire, muroora wangu akanga asingabereki, pakutanga kwazvo. Akanga asingakwanisi kubereka vana. Uye rimwe zuva, tichibva mumusangano, Ishe Akatura kwandiri uye Akati, "Loyce, uchabereka mwanakomana. Ishe Akuropafadza. Dambudziko rako somudzimai rapera." Paul muduku uyu ndokubva aberekwa, mwedzi mipfumbamwe yakatevera.

9 Mwedzi miviri mwana uyu avepo ikozvino asati aberekwa, ndakange ndigere, ndichidya kudyakwamanwanani, patafura, uye Loyce naBilly vagere kune rumwe rutivi mhiri kwetafura yandaiva. Uye ndakaona Loyce achimwisa mwana mucheche aine shawero yeruvara rwe-pink . . . shawero yoruvara rwe-blue yakaputira mwana. Uye Billy agere pakona, achipa Paul zvokudya. Ndakabva ndati, "Billy, ndichangobva kuona chiratidzo. Loyce achimwisa muchecheche akaputirwa neshawero yeruvara rwe-blue."

Iye ndokuti, "Herwo rwendo rwango rwokuvhima. Kwasara mwedzi mipfumbamwe bedzi kubva zvino."

Mushure momwedzi gumi noumwechete, Dhavidi muduku uyu akaberekwa. Uye handina kumbowana mukana wokuti ndimukumikidze Kuna Ishe, uye handiuwani kusvikira ndadzoka zvakare. Saka munoonazvazviri.

10 Vanhu ndinovada zvakanyanya sei uye nokuyanana navo! Asi hama dzedu dzanga dziri kunamatira vanorwara, uye ndinoziva kuti vanga vachibudirira. Husiku hwoga-hwoga tanga tiri kunamatira varwere, umwe noumwe akaturikana maoko, tose zvedu pamwechete, zvinova zvinoratidza pfungwa yacho yose yezvazviri. Asi zvichida, kana Mwari Atendera . . . Ndichazviisa pakokero, kana tichinge tatumira. Pandinodzoka, ndinoda kutsaurira mazuva maviri kanamatatu, zvakare, kukunamatirwa kwavarwere uye toita patinogona napo saizvozvo. Zvino, uyewo ndinotenda vanhu norubetsero rwavo, zvakare.

11 Zvino ndinoda kungopa chitaurywa chinotsigira, kwenguva dukusa, pamusoro pe-peMharidzo yamangwanani anhasi. Handipokani nazvo, handina kunyaatsa kuipedza yose zvayo, asi ndinotenda kuti muchanzwisia. Uye ndinechokwadi chokuti hamuna ku . . . Hamuzombozivi zvazvanga zvichida kuti ndiite.

Zvino, zvinoita sezviri nyore kwamuri. Asi, imi, munoonahere zvamunofanira kuita? Mavakutora nzvimbo YaMwari, kuti muzivise Chimwe Chinhu. Uye ndisati ndadaro, ndaifanira kutanga ndapiwa mhinduro pazviri kubva Kuna Mwari. Uye Iye Aifanira kuburuka, uye Ozviratidza zvinooneka Iye Pachake, uye Opa Chizaruro. Naizvozvo, munoonahere, izvi zvakapiwa kuKereke. Uye murangarire, ndakati, "Zvinu izvi, zvinova zvandakaura nezvazvo, zvakapiwa kuKereke bedzi."

Uye kuti mugova nokukudzikana uye muzive kuti, Aiva Mwari Mumwechete Akataura neni kumusoro uko zvapaive pasina kana netsindi zvayo. "Taura, uye ureve padzinofanira kunge dziri." Uye nguva nhatu dzakatevedzana zvakaitika saizvozvo. Zvino, kana Iye Achigona kusika chimwe chinhu changa chisitoripo, Zvinhu Izvi Zvinozoramba Zvimire zvakadii Muzuva riya Rokutongwa! Maona? Vanhu vakanga varipo kuti vaone zvinhu izvi, uye kuti vagoziva. Sokutaurwa kwazvo naPauro, mumazuva akapfuura. Aiva navanhu vaifamba navo ipapo, vaka-vakanza nyika ichindengendeka; asi havana kunzwa inzwi, asi vaka-vakaona Shongwe YeGore Remoto.

12 Zvakandiitira zvakanaka, mushure mukupera kwayo; kuzoona varume nemadzimai avo, avo vandinoziva saMaKristu chaiwo, vachimbundirana uye nokuchema.

Uye inzwaika, shamwari, Mwari Anosimbisa Shoko Rake nezviratidzo nezvinosimbisa, kuratidza kuti Ndere Chokwadi, Shoko rakataurwa. Zvino murangarire, kuti Chiedza Chaivamo MuGore Riya, Rakapa Chizaruro. Ndakanga ndiri . . .

Mwanasikana wangu muduku aindiudza, Sarah aripano, kuti pavakange va . . . Kuti chikoro ichi kuArizona chakanga chakatairira mudenga umu maive musina kana makore, uye vachiona Gore Iri Rinoshamisa Raive pamusoro pegomo, richikwidza-nokudzika, Riine Moto woruvara rwe-Amber. Mudzidzisa wakabudisa vana panze pamwechete nechikoro, uye ndokuvaunza mberi kwechikoro, uye ndokuti, "Makamboona here chinhu chakadai? Tarisai neuko kwachiri."

Murangarire, Ndicho Chiedza chimwechetecho choruvara rwe-Amber Chaiva padombo iro. Saka NdiMwari Mumwechete, Chizaruro Chimwechete, Ndokuti, "Vaudze vagoita izivi."

13 Kana zvirizvo kuti shamwari yangu, Hama Roy Roberson, yakateerera ikovzino vari kuTucson. Roy, unorangarira here, musi uya, chiratidzo chawakaona pataive timire kunze uko pamusoro pegomo? Ukauya kwandiri, uye Gore Iri Riri nechepamusoro? Ndokuuya uchifamba uchidzika, ZvaAkakuudza unozziviziva; uye nezvandakakuudza kumba kuya, rimwe zuva riya? Ndizvo Izvi, Roy. Usasanetseka zvachose, mwanakomana. Zvapera.

Hamunyatso nzwisia zvazvinoreva! Inyasha. Anokudai. Uyewo imi Mudei, muMushumire nokuzvininipa uye muMunamate kwamazuva enyu ose. Ivai vane mufaro, endai henyu mberi uye murarame sezvamuri. Kana muine mufaro, enderererai mberi makadaro. Musafa makadzokorora chakaipazve, chakafanana naichocho. Enderererai mberi. Inyasha DzaMwari.

14 Zvino ndinoda kunamatatzve tisatitapinda MuShoko. Vangani vachandinamatira? Ndiri kungopinda mune umwe musangano ndichibva mune umwe. Muchandinamatira here?

Munoziva, ndinoda kukuimbirai kamwe karwiyo kaduku, tose pamwechete, tisati tapinda MuShoko. Kuitira kuti . . . tigoziva kuti Mwari . . . Kunova kungokumikidzawo kuduku. Makambonzwa here rwiyo rwuduku urwu, Ane Hanya Newe? "Munguva dzokupenya kwezuva kana dzekushushikana, Ane hanya newe."

Mudzimai muduku uyu arikukwidza kuno ku-piano. Ndizvo, ndinoda kumutenda mudzimai muduku uyu, zvakare. Ndanga ndisingazivi kuti ndiani. Mwanasikana weumwe wamadhikoni epano. Zvirokwazvo ndinoda . . . Mwanasikana muduku waHama Wheeler. Akura zvino. Aiva musikana muduku-duku aigariswa pagumbo, nguva pfupi yadarika, uye ava mhandara zvino. Saka ndinoda kumutenda zvirokwazvo nokuda kwokuti ashandisa chipo chake ichi chomumhanzi, uye ikovzino wavakuridza zvinoropafadza. Mungatipa here muririro chaiwo, vahanzvadzi? Tose pamwechete zvino.

Ane hanya newe,

Ane hanya newe;

Munguva dzokupenya kwezuva kana dzine mumvuri

Ane hanya newe.

Munozvida here izvi? Ngatiimbei zvakare, psmwechete.

Ane hanya newe,

Ane hanya newe;

Hama Dauch, Anehanya nemi, zvakare, hama. Munomuda here? [Ungano inoti, "Ameni." - Ed.]

Ngatikotamisei misoro yedu zvino.

15 Mwari Anodikanwa Anenyasha, ndiine karugwaro aka kaduku kezvinhu zvishomanana zvandingada kutaura kuvanhu, uye ndadzokazve ndichipa nongedzo kuzvinhu zvamangwanani anhasi, nokuti ndizvo zvavingwa navanhu kuti vagonzwa. Ndininamata, Mwari, kuti Mutendere vanhu vazvione kuti Mwari

Anovada uye Anehanya navo. Uyewo kuti anga asiri ini apa Zvinhu Izvo, Ishe, zvakasimbiswa kuti Ichokwadi. Saka ndinonamata, Mwari Anodikanwa, kuti rudo Rwenyu rwugogara nguva dzose pakati pavanhu. Manheru ano, kuti tizosvika pakuparadzana musangano uno wapera uye toenda kudzimba dzedu kwakasiyana-siyana, zvinoita-zvinoita sezvinotirwadza, zvakati, dzikei, Ishe. Ndinonamata kuti Muropafadze vanhu ava.

Zvino zvatava kupinda mushoko, tiri mumunamato, uye tatarisana NeShoko Rakanyorwa, tinokumbira kuti Imi mugotora Shoko Iri Rakanyorwa uyewo Muriite benyu kватiri Manheru ano. Uyewo patichabva pachivakwa chino manheru ano toparadzana kuenda kudzimba dzedu kwakasiyana-siyana, tigozotaura sevaya vaibva Emmaus, vaya vakanga vafamba Naye kwezuva rose asi vasati vaMuziva Iye; asi Akati Apinda navo muimba husiku ihwohwo, uye masuwo ose avharwa, Ane chinhu ChaAkaita Chakafanana neChaAkaita Asati Arovererwa. Kuburikidza Naizvozvo, vakabva vazviziva kuti Akanga Amuka zvakare.

Zviitei zvakare Manheru ano, Ishe. Ngazviitwe, tavhara masuwo kudai, uye boka Renyu duku iri ragara zvino pano, rakamirira. Uyewo, Baba, patinoenda kudzimba dzedu, tinozotaura sokutaura kwavo, "Moyo yedu haina kutsva here matiri apo Anga Achitaura nesu munzira!" Tinozvikumikidza isu, uye navose zvavo, mumaoko Enyu, Ishe. Itai zvaMunoda nesu. Muzita RaJesu. Ameni.

16 Zvino ngatibvai tangopinda mushumiro ikozvino, nokukurumidza. Zvino ngativhurei pamwechete nen, kana muchikwanisa, kubhuku yaVaHebheru, uyewo hechi chimwe chizaruro cheMharidzo. Tichataura kwenguva pfupi Manheru ano, Ishe Achitendera. Uyewo tichiverenga ndima nhatu dzokutanga dzaVaHebheru chitsauko 7 ndima 1 kusvika 3, uye tigopa chitaurwa chinotsigira izvi. Uye hatizivi izvo Ishe Achaita; hatizivi. Chinhu choga chatingaita kutenda chete, totarisira, tichinamata. Ndizvo here? Uye totenda kuti "Anoita kuti zvose zvishande mukunaka kune avo vanoMuda Iye," nekuti Akavimbisa kudaro.

Nokuti Merikizedheki Uyu, mambo we-Salem, mupristi WaMwari Wokumusoro-soro, Akasangana naAbhurahama achibva kundoparadza madzimambo, uye Akamuropafadza;

Kuna Iye Akapiwa chegumi chazvose; kutanga mukududzirwa Achinzi Mambo wokururama, uye mushure mazvo Onzi Mambo we-Salem, Mambo worugare;

Ngatirambe tichiverenga.

Asina baba, Asina amai, Asina dzinza raAnobva, . . . Asina mavambo amazuva, kana magumo ohupenyu; asi Akaumbwa Achitoredzera Mwanakomana WaMwari; Achiramba Ari mupristi nokusingaperi.

17 Imbofungai pamusoro Pake Munhu mukuru Akadai, kuti Anofanira Ari Mukuru zvakadii! Uye zvino, heuno mubvunzo, "Ndianiko Murume uyu??" Vefundho dzeBhaibheri vakava namaonero avo. Asi kubva zvazaruka Zvisimbiso Zvinomwe, Bhuku yakavanzika yakambenge yakavanzika kватiri . . . Maringe naZvakazarurwa chitsauko 10 ndima 1 kusvika 7, zvakavanzika zvose zvakanyorwa muBhuku Iyi, zvakanga zvakavanzwa mumazera ose aya evavandudzi, zvinofanira kuiswa pachena kuburikidza nomutumwa wechizvarwa chokugumisira. Vangani vanoziva kuti ichokwadi? [Ungano inoti "Ameni." -Ed] Ndizvozvo, zvinofanira kuiswa pachena. Zvakavanzika zvose zveBhuku iyi yakavanzika zvinofanira kuzaruka kunhume yechizvarwa cheRaodhokiya.

Tichiona kuti pane gakava guru pamusoro peMunhu Uyu uye nechidzidzo ichi, ndinofunga kuti zvinotigomedzera kuti tipinde machiri, tigoona kuti Ndianiko Uyu. Zvino, kune maonero akasiyana-siyana pamusoro Pamusoro Pake.

Mamwewo maonero, anotaura achiti, "Aiva Ari fungidzirowo zvayo. Akange Asiri Munhu."

Vamwewo votaura, vachiti, "Hwaiva hupristi. Hwaiva hupristi HwaMerikizedheki." Maonero awa ndiwo aripedosa, arinani kudarika mamwe maonero aya, nokuda kwokuti vanoti hwaiva hupristi.

Hazvigoni kudaro, nokuti ndima 4 Inoti Aiva Munhu, "Munhurume." Saka, kuti Anzi Munhu, Anofanira kuva nechimiro chohunhu, "Munhurume." Kwete hurongwa; asi Aiva Munhu! Saka Akanga Asiri hurongwa hweupristi chete, Akanga Asirizve fungidziro. Aiva Munhu.

18 Zvino Munhu Uyu Ndewe Zienda-nakuenda. Kana mukazvicherechedza, "Akanga Asina baba. Akanga Asina amai. Akanga Asina nguva yamavambo Ake. Uyewo Haana nguva yokuguma Kwake." Uye hazvinei kuti Munhu Uyu Aiva Ani, Achiri Mupenyu Manheru ano, nekuti Bhaibheri Rataura kudaro pano, kuti, "Akanga Asina baba, kana mai, mavambo amazuva Ake, kana magumo ehupenyu." Saka Anofanira Kuva Munhu WeZienda-nakuenda. Ndizvo here? [Ungano inoti "Ameni." -Ed.] Munhu WeZienda-nakuenda! Saka Aingogona kuva Munhu Mumwechete bedzi, Anova Mwari, nekuti Ndiye Woga WeZienda-nakuenda. Mwari!

Zvino, muna Timoti wokutanga chitsauko 6 ndima 15 uye 16, kana Uchida kuzopaverenga pane imwe nguva, ndigada kuti upaverenge.

Zvino, chinhu chandinorwira ndecekuti, kuti, Aiva Mwari, nekuti Ndiye Woga Munhu Asingafi. Uyewo, Mwari Pachavo Vachivishandura kuva Munhu; ndizvo ZvaAiva, "Asina baba, kana mai, Asina mavambo ohupenyu, kana magumo amazuvva."

19 Zvino tinozviona muGwaro kuti vanhu vakawanda vanodzidzisa izvi, "HuMwari Hune vanhu vatatu vakasiyana." Saka, haugoni kuva nohunhu hwomunhu kana usiri munhu. Zvinotora munhu kuti pave nohunhu hwomunhu.

Mumwe mushumiri wechiBaptist, mavhiki mashoma apfuura, wakauya kwandiri, uye kumba kwangu, uye akati, "Ndimoda kukutwasura maringe nenyaya YoHuMwari pane imwe nguva kana wawana mukana." Akandibata panhare, ndinoda kudaro.

Ndakati, "Mukana ndinayo izvozvi, nekuti ndinoda kuva akatwasuka, uye ndingasiya zvose hazvo parutivi, tiite chinhu ichi."

Uye akauya, iye ndokuti, "Hama Branham, munodzidzisa kuti Kuna Mwari Mumwechete."

Ndakati, "Hongu, changamire."

Iye ndokuti, "Zvakanaka," iye ndokuti, "Ndinotenda kuti Kuna Mwari Mumwechete, asi Mwari Mumwechete Ane Hunhu Hutatu."

Ndakati, "Changamire, dzokorodzai zvakare."

Iye ndokuti, "Mwari Mumwechete, Ane Hunhu Hutatu."

Ini ndokuti, "Chikoro chenyu makapindirepi?" Maona? Iye ndokundiudza kuti ku-kuchikoro cheBhaibheri. Ndakabva ndati, "Ndaigona kuzvitenda izvi. Haugoni kuva munhu usina hunhu. Uye kana uine hunhu hwomunhu, une hunhu humwechete hwako woga. Wakatosiyana, uri munhu akazvimiririra."

Uye iye ndokuti, "Zvakanaka, vafundhi veBhaibheri havatogoni kuzvitsanangura."

Ndakati, "Zvinouya nechizaruro."

Uye iye ndokuti, "Handigamuchiri chizaruro."

Ini ndokuti, "Saka hapana nzira yokuti Mwari Auye kwauri, nekuti, "Zvakavanzwa kubva kumeso evakachenjera uye vakangwara, asi zvichizarurwa kuvacheche, kuzarurwa, chizaruro, 'kuzarurwa kuvacheche avo vanozvigamuchira, vanoda kudzidza.'" Uye ndakati, "Hapana nzira yokuti Mwari Auye kwauri; uno Mudzivisa wega pachako kuti Auye."

Rose Bhaibheri chizaruro ChaMwari. Kereke yose zvavo yakawakirwa pachizaruro ChaMwari. Hakuna imwe nzira yaungaziva nayo Mwari, kunze kwenzira yechizaruro. Saka, kugamuch . . . Kusagamuchira kwako chizaruro, zvinoreva kuti uri wefundho dzeBhaibheri akatonhora, uye kwauri hakuchina tariro.

20 Zvino, zvino, tinoona kuti Munhu Uyu "Akanga Asina baba, kana mai, Asina mavambo amazuva kana magumo ohupenyu." Aiva Mwari, Achishandura zviso zvake.

Zvino, nyika, shoko iri rino bva, shoko rechiGreek iri, rinoreva, "shanduko," rakashandiswa. Achizvishandura, kushandura huso, kubva mukuva mumwe munhu uchindova . . . Asi Munhu Mumwechete; shoko riripo mururimi rweGreek, kushandura huso, zvinoreva kuti . . . Rakatorwa kubva pamuitiro wavatambi vebhaisikopo, kuti munhu mumwechete anoshandura huso hwake, kuti agova mumwe mutambi zvakare.

Sezvazviri ku-kuchikoro, nguva pfupi yapfuura, ndinotenda kudaro, Rebekah, asati apuwa chitupa chokupedza chikoro, kwakaitwa mutambo waShakespeare. Uye mumwe mujaya akachinja hanzu dzake kakawanda, nekuti akanga achitamba zvinzvimbos zvavatambi vaviri kana kana vatatu vakasiyana; asi, iye ari munhu mumwechete. Aibuda, pane imwe nguva, somunhu akaipa anopara mhosva huru; uye aibudazve nguva inotevera, somumwe mutambi. Uyewo shoko rechiGreek rinoti, kushandura huso, rinoreva kuti "akashandura huso."

21 Uye ndizvo zvakaitwa NaMwari. NdiMwari Mumwechete nguva dzose. Mwari Ari muchimiro ChaBaba, Iye-Iye Mweya, Shongwe YeGore Remoto. Mwari Mumwechete Akaitwa nyama Akagara pakati pedu, kushandura huso, Akaunzwa pano kuti Aonekwe. Uyewo Mwari Mumwechete Ndiye Mweya Mutsvene. Baba, Mwanakomana, Mweya Mutsve . . . kwete VaMwari vatatu; mahofisi matatu, hunhu hutatu HwaMwari Mumwechete.

Bhaibheri Rakati, "Kuna Mwari Mumwechete," kwete vatatu. Asi ndicho chikonzero vasingakwanisi . . . Haugoni kuzvitwasura uye wova NaVaMwari vatatu. Hausi wakaona muJudha achidaro. Ndinokuudza chinhu ichi. Uyo anoziva zvirinani, anoziva kuti Kuna Mwari Mumwechete.

22 Mucherechedze, somuvezi, anovanza chivezwa chake, nechi-nechidzitiro pamusoro pacho. Ndizvo zvaitwa NaMwari kuchizvarwa chino. Zvanga zvakavanzwa. Zvinhu zvose zvanga zvakavanzwa, uye zvinofanira kuzarurwa muchizvarwa chino. Zvino, Bhaibheri Rinoti zvichizarurwa munguva dzekeguma. Zvafanana nomuvezi anochengeta basa ra-rake rakavharwa zvaro kusvikira nguva iyo yaano bvisa chidzitiro ichi uye hecho choonekwa.

Ndizvo zvanga zvakaitwa Bhaibheri. Ranga Riri basa RaMwari RaAnga Akadzitira. Uye Ranga Rakavanzwa kubva nheyo dzenyika dzisati dzavambwa, uye nechakavanzika Charo Chakapetwa Runomwe. Uye Mwari Wakavimbisa muzuva rino, pachizvarwa chekereke yeRaodhokiya, kuti Aizobvisa chidzitiro chaiva pabasa iri uyewo kuti tigone kuRiona. Chinhu chakanaka zvakadii!

Mwari, Achishandura huso, Akadzitirwa MuShongwe YeGore Remoto. Mwari, Achishandura huso, Ari Mumunhu anonzi Jesu. Mwari, Achishandura huso, Ari muKereke Yake. Mwari Ari pamusoro pedu, Mwari Anesu; kuburuka Kwake Mwari. Kumusoro uko, Akarurama, hakuna waigona kuMubata, Iye Wakaburukira pagomo; uye kunyangwe nemhuka yaizoguma gomo, yaifanira kufa.

Ipapo Mwari Akaburuka uye ndokushandura tendhe Rake, uye ndokuburukira Akagara nesu, Akava mumwe wedu. "Uyewo takAMubata namawoko edu," Bhaibheri Rakadaro. Timoti wokutanga Chitsauko 3 ndima 16, "Pasina kupokana chikuru ichi chakavanzika choHuMwari; nekuti Mwari Akaratidzwa munyama, Akabatwa namaoko." Mwari Akadya nyama. Mwari Akanwa mvura. Mwari Akakotsira. Mwari Akachema. Aiva mumwe wedu. Zvakanakisa, zvine mumvuri muBhaibheri!

Mwari pamusoro pedu; Mwari Anesu; zvino Ava Mwari matiri, Iye Mweya Mutsvene. Kwete mumwe munhu wechitatu; asi Munhu Mumwechete!

23 Mwari Akaburuka uye Akava nyama, uye Akafa rufu, Ari MuNaKristu; kuitira kuti Achenese kereke, kuti Agone kupinda mairi, kuitira kuyanana. Mwari Anoda kuyanana. Ndicho chikonzero Akasika munhu pakutanga kwazvo, kuitira kuyanana; Mwari Anogara Oga, naMakerubhi.

Uyewo mucherechedze, Akasika munhu, uye munhu ndokuwa. Saka Iye Akaburuka uye ndokuzodzikinura munhu, nekuti Mwari Anoda kunamatwa. Shoko rimwechete iri yokuti mwari rinoreva kuti "chinhu chinonamatwa."

Chinhu Ichi Chinouya pakati pedu, SeShongwe YeGore Remoto, seChino unza shanduko mumoyo yedu, Ndiye Mwari Mumwechete Akati, "Ngakuve NeChiedza," uye chiedza chikavako. Ndiye Mumwechete zuro, nhasi nokusingaperi.

24 Zvino pakutanga Mwari Aigara Oga, Aine zvizenga zvake, sokautaura kwandaita mangwanani ranhasi. Dzinova ndidzo pfungwa Dzake. Kwakanga kusina chaivako, Aingova Mwari Oga, asi Aiva nepfungwa Dzake.

Sezvingaita woumhizha mukuru kuti anomisikidza zvinhu, mupfungwa dzake, uye onyora pasi mamiriro echinhu chaanoda ku-kuvaka. Kusika, zvino, haagoni kusika. Anotora icho chakasikwa kare uye woshanda nacho kuumbiridza chimwe chinhu neimwe nzira; nekuti Mwari Ndiye Ega nzira . . . Woga Anogona kusika. Asi anozvibata mupfungwa dzake izvo anoda kuita, uye ipfungwa yake iyi, uye neshuviro yake. Zvino iyi ipfungwa, uye ipapo anozoitaura uye yobva yava shoko ipapo. Uye sho-shoko ndiro . . .

Pfungwa, kana ichinge yaratidzwa, yava shoko. Pfungwa yaratidzwa yatova shoko, asi rinofanira kutanga riri pfungwa. Saka, zvinotanga zviri zvizenga ZvaMwari; zvozova pfungwa, zvopedzesera zvava Shoko.

25 Mucherechedze. Avo vane, Manheru ano, Hupenyu Husingaperi, vakange vaiNaye uye vari MaAri, vari Mumufungo Wake, kusati kwatombova kana noMutumwa, nyeredzi, MaKerubhi, kana chipi nechipi zvacho. Zienda-nakuenda Iri. Uyewo kana uinahwo Hupenyu Husingaperi, waivako nguva dzose idzi. Kwete somunhu wako uyu aripano, asi sekuonekwa uye nechimiro icho Mwari Uyu Asina mavambo nokuguma . . .

Zvino kana Iye Asiri weZienda-nakuenda, HaAsi Mwari. Nokuti Mwari Anofanira kusava namavambo kana magumo. Isu tiri veZienda-nakuenda; Iye Ndewe Zienda-nakuenda. Aiwanikwa munzvimbo dzose, Achiziva zvose, uye NdiSamasimba. Kana Asiri zvinhu izvu, zvino HaAgoni kunzi Mwari. Anoziva zvinhu zvose, nzvimbo dzose, nokuti Arikó kwose-kwose. Kuva Anoziva zvose kunoMuita kuti Ave kwose-kwose. Iye Munhu Pachake; HaAna kufanana nemhepo. Iye Munhu Pachake; Aneimba YaAnogara. Asi kuziva Kwake zvose, Achiziva zvose, kunoMuita kuti Ave kwose-kwose, nekuti Anoziva zvose zviri kutiika.

Hapagoni kuva neinda ingabwaira ziso rayo zvisingazivikanwi Naye. Uye Iye Akazviziva izvi nyika isati yavapo, kuti yaizobwaira maziso ayo rungani, uye kuti yaizova namafuta mangani mairi okukora kwayo, nyika ino isati yavako. Ndiko kuva weZienda-nakuenda. Hatingagoni kuzvinzwisa nepfungwa dzedu, asi ndizvo zviri Mwari. Mwari, Asina mavambo kana magumo!

26 Uye murangarire kuti, imi, maziso ako, chimiro chomutumbi wako, zvose hazvo zvawaiva, wakanga uri mupfungwa Dzake Iye pamavambo. Uyewo chinhu bedzi chauri ikozvino ndiko kuratidzwa, KweShoko. Mushure mokunge Arifunga, Akaritaura, uye hezvo uripano. Dai zvaisava saizvozvo, dai wakanga usimo mupfungwa Dzake, hapana kana nzira imwechete yawaigona nayo kuva pano, nekuti Iye Ndiye Anopa Hupenyu Husingaperi.

Munorangarira here maverengero atazviita muGwaro? "Hazvisi zveuyo unoshuvira pachake, kan uyo unomhanya, asi Mwari!" Uyewo kuitira kuti kufanotemera Kwake kuve kunoitika, Waigona kusarudza, nguva ipi neipi isati yakwana, waAnoda. Mwari Anozvitongera pakusarudza Kwake. Maizviziva here? Kuti Mwari Anozvitongera Oga. Ndiani aivako kare ikoko kuti audze Mwari imwe nzira ingava nani pakusika Kwake nyika? Ndiani angava noushingi hwakadai kuti audze Mwari kuti Akafambisa basa Rake zvisizvo? Kunyangwe Iro-Iro Shoko, Pacharo, Rine kuzvitongera. Kunyangwe chizaruro chinozvitongera. "Iye Achazarurira waAnoda kuzarurira." Chizaruro ichi, pachezvacho, chinozvitongera MuNaMwari. Ndiwo muitiro wavanhu vachirovedzera pazvinhu, vachikwakukira zvinhu, uye nokurevedzera pazvinhu, ivo vasingazivi zvavari kuita. Mwari Anozvitongera pamabasa Ake.

27 Zvino tinoMuona pakutanga, Aine zvizenga Zvake. Uye, zvino, wakanga uri MaAri ipapo. Ipapo Bhuku Iyi YeHupenyu ndipo paYakatanga kuonekwa.

Zvino, tinoverenga pano muna Zvakazarurwa chitsauko 13, mdima 8, kuti, "Chikara chakanyukuka kubva panyika," mumazuva ano okugumisira, "chichazonyengera vanhu vose vapanyika vaiva namazita akanga asimo kunyorwa MuBhuku YeHupenyu YeGwayana nheyo dzenyika dzisati dzavambwa."

Chimbozvifunga! Jesu Asati Aberekwa, makore zviuru zvina Asati Auya panyika, uyewo chitsama chakati kuti chezviuru zvamakore iwe usati wuya panyika; Jesu, Ari mupfungwa DzaNwari, Ndokufira zvivi zvenyika, uyewo Bhuku YeHupenyu ndokuvepo, zita rako ndokunyowamo MuBhuku YeHupenyu nheyo dzenyika dzisati dzavambwa. Ndicho Chokwadi CheBhaibheri. Maona, zita rako rakagadzwa NaMwari uye rikaiswa MuBhuku YeHupenyu nheyo dzenyika dzisati dzavambwa.

Wakanga urimo muzvizenga Zvake. Hauchazvirangariri bedzi, kwete, nokuti waiva chikamu CheHupenyu Hwake. Uri chikamu ChaMwari kana wava mwanakomana kana kuti mwanasikana WaMwari.

Sezvazviri kuti uri chikamu chababa vako vepanyika pano! Ndizvozvo. Ndizvo zvauri. Munhurume ndiye anotakura chizenga cheropa, iro ropa. Uye kana chabatana ne-nezai, ipapo wava chikamu chababa vako; uyewo amai vako chikamu chababa vako, zvakare; saka mose muri chikamu chababa vako.

Mwari Arumbidzwe! Izvi zvinorasira masangano kunze, zvachose. Uh-huh. Zvirokwazvo zvinodaro! Mwari, munazvose, munzvimbo iyi bedzi!

28 Mucherechedze zvino chizenga Chake ichi. Ipapo chizenga ichi chakava, pakutanga, Mwari; iyo pfungwa, chizenga pachezvacho, zvose zviri mune Mumwechete Uyu, isati yaratidzwa. Zvino PaAkairatidza, pachinzvimbo chepiri, Akabva Ava Shoko. "Uye Shok Rkakaitwa nyama uye Rikagara pakati pedu."

Johani chitsauko 1 ndima 1, cherechedzai, izvi zviri, "Pakutanga." Asi, kumashure uko, Raiva reZienda-nakuenda! Muzvicherechedze, "Pakutanga kwakange kuine Shoko." Panguva iyi yokutanga kwenguva, yaiva Shoko. Asi isati yava Shoko, yaiva chizenga,pfungwa. Avino ndokuzoratidzwa, "Pakutanga kwakanga," kuratidzwa kwayo, "Iro Shoko."

Zvino tavakusvika pana Merikizedheki Uyu. Ndiye Munhu Uyu Asinganzwisisika. "Pakutanga kwakange kuine Shoko, uye Shoko Rakanga Riina Mwari, uye Shoko Rakanga Riri Mwari." "Uye Shoko Rakava nyama Rikagara pakati pedu." Zvino chibatirai pane izvi, mucherechedze.

Chimiro Cha-Chake Chohumunhu Chaiva Mweya, Mwari, muchiero chemweye, zvakanaka, Iye Mukuru Uyu WeZienda-nakuenda. Chechipiri, Akabva Atanga kuZviumbirdza Iye Pachake Akananga kuzova nyama, Ari mumutumbi WeShoko, unodaizwa kunzi, "WeShoko; mutumbi." Ichi zvino ndicho chimiro ChaAkanga Ari PaAkasangana naAbhurahama, Achidaidzwa kunzi Merikizedheki. Akanga Ari muchimiro chemutumbi WeShoko. Zvino tichasvika pazviri uye tizvitsigire mumamitsi mashoma-shoma, Ishe Achitendera. Akanga Ari Shoko.

29 Mutumbi WeShoko Chinhu chausingagoni kuona. Unogona kuva pano ikozvino, asi iwe haugoni kuuona. Zvakangofanana, tingati, neterevhizheni. Zvinhu izvi zviri mune chihimwe chiero chokuraramira. Terevhizheni; vanhu varikutofamba nemuno ikozvino, vachiimba; pane mavara arimuno, zvakare. Asi ziso rakaganhurwa nepfungwa shanu bedzi . . . Mutumbi wako wose unoganhurwa nepfungwa shanu idzi, ndinoreva kudaro. Uye unongogona bedzi kuzviisa pasi kuzvinhu zvakaganhurirwa ziso rako kuti rione nepfungwa shanu. Asi chiriko chimwe chiero chokuraramira chinogona kuonekwa kana paitwa shanduko kubva mune chino, kuburikidza neterevhizheni.

Zvino, terevhizheni haigadziri mufananidzo. Asi terevhizheni inongoavipa nzira rokuti zvipinde mugwara, uye girazi reterevhizheni robva razvibata. Asi mufananidzo uyu wagara uripo, pakutanga kwazvo. Terevhizheni yaivako mazuva ayo Adama aiva pano. Terevhizheni yaivapo pano panguva iyo Eriya akagara mugomo reCarmel. Terevhizheni yaivako apo Jesu Akafamba pamenderekedzo dzengungwa dzeGareririya. Asi ikozvino ndipo pamuchangobva kuziva nezvayo. Havaizogona kuitenda kare ikoko. Waizova somunhu anopenga kana ukutura nezvayo. Asi ikozvinhu chava chinhu chinobatika.

Uyewo ndizvo zvazviri, kuti Kristu Aripano, Vatumwa VaMwari varipano. Uyewo nerimwe zuva, mu-Millenium huru inouya, Millenium iyi ichava inobatika kwazvo kudarika zvinoita terevhizheni kana chimwe chinhu zvacho, nekuti iripano.

Iye Anozvizarura Pachake muchimiro Chake chikuru maringe nekutura Kwake, apo Iye Anenge Achishandura huso Hwake Achipinda muvaranda Vake uye Achizviratidza Pachake.

Zvino, heuno Ari pano Ari muchimiro ChaMweya. Uye ipapo Ouya Ari muchimiro che . . . kushandura huso. Zvino, Akazviratidza kuna Abhurahama, Ari mukushandurwa kwohuso. Abhurahama ari munzira kudzoka kubva kundoparadza madzimambo, hapano Merikizedheki Anouya, Ndokutura naye.

30 Rimwe zuva riya mubepa nhau roku-Tucson, ndakanga ndichiverenga chinyorwa chaivamo pamusoro po-poumwe mudzimai aityaira achidzika nougwagwa, ndinotenda aimhanya mayera makumi mana, kana kuti makumi mashanu muawa imwechete, uye ndokubva arova mumwe murume akwegura aiva akapfeka bhachi refu. Mudzimai uyu akaridza mhere uye ndokumisa motokari yake. Kurova kwandamuita nayo kwakamukanda mudenga. Kunze ikoko raiva gwenga zvaro rakazvichenera! Uye akamhanya kudzokera kuti atsvage mukweguru uyu, uye akamusahiwa. Saka mudzimai uyu akaitei? Vamwe vanhu vaiva shure kwake vakazviona zvichiitika, vakaona mukweguru uyu achikandwa mudenga, uyewo nebhachi rake refu riya richikwidibira. Saka vakamhanya kuti vandoona. Havana munhu wavakaona. Vakadaidza mapurisa ipapo. Mapurisa ndokuuya kuti vave vanoongorora nzvimbo iyi, hapana kan munhu wavakaona ipapo.

Zvakanaka, mumwe noumwe wavo ipapo akapupura achiti, "Motokari yanzvengera rutivi, ndokurova mumwe murume. Akandwa mudenga, uye zvaonekwa nomunhu wose." Zvapupu, zviviri kana zvitatu zvazvo zviva mudzimota, zvakanga zvona zvichiitika. Ndokuzoona kuti, makore mashanu akanga apfuura, paive nemumwe murume akwegura aiva akapfeka bhachi refu, akarohwa nemotokari uye ndokufira panzvimbio imwechete iyi.

Paunobva panyika pano, unenge usina kufa. Unofanira kuzodzoka, kunyangwe waiva mutadzi, uye kuti ugotongwa maringe nezviito zvakaitwa mumutumbi. "Kana tabhenekari iyi yanyungudika, tine imwe yakatimirira." Kushandura huso, ndiro shoko racho.

31 Zvino, mwari, muchiyero ichi che . . . Chiyero ichi chokusika Kwake, gare-gare Ndokuumbwa munyama, Jesu. Achibva mune zvipi? Kubva kumavambo makuru, SaMweya, Ndokuzoburuka kuva Shoko, Richizviunza pachena Romene. Shoko Haringozviunzi Roga, Rinongotaurwa bedzi, kushandura huso, gare-gare Ndokuva nyama, Jesu, kuzofa, kuti Aravire rufu kuitira isu tose vatadzi.

Abhurahama paakasangana Naye, Aiva Merikizedheki. Anobhedhenura pano zvose zvichaitwa nezvizenga zvake mumagumo okupedisira, kumwanakomana waAbhurahama. Mwanakomana wose woKutenda zvirokwazvo uchaita zvime zvimechete. Asi ndinoda kutarira muuyiro wedu.

Uyewo, tinoona Iye Achizarurwa pano munaRute na-naBowazi, seMudzikinuri Wehama, mauyiro Ake Aaizoita munyama.

32 Zvino tinoona chizenga ichi, chevanakomana VoMweya Wake, Asati zvino apinda mumutumbi Wake wakaumbwa NeShoko. Asi, Ari mutumbi WeShoko; mutumbi uyu uri pasi PeShoko uye nokuperera kose, wakamirira nokupererakwose, kuti mutumbi ushandurwe.

Zvino, ndiwo mutsauko Wake Iye newe, somwanakomana. Maona, Akanga Ari, pakutanga, Shoko, mumutumbi unoshandura huso. Akanya kuburikidza nawo uye Akagara mauri, MuHunhu Hwomunhu HwaMerikizedheki, nekuti Akazova Jesu Kristu. Merikizedheki Aiva muPristi, asi Akazova Jesu Kristu. Zvino, wakachirika zvinhu izvi. Nekuti, Ari muchimiro ichi, Akaziva zvinhu zvose, uyewo iwe hausati wagona kuzviviza zvinhu izvi.

Wakauya nomuuyiro waAdhamu, seniwo, wakabva mukuva chizenga ndokuitwa nyama, kuti ugoedzwa. Asi kana hupenyu hwapano hwapfuura, "Kana tabhenakeri iyiyepanyika yanyungudika, tinayo imwe yakatimirira nechekare." Ndiko kwatinoenda ikoko; Rinova Ndiro Shoko. Zvino ipapo tinogona kutarira shure uye toona zvatakaita. Ikozvino hatina kunzwisia pazvihu izvi. Hatina kumbobvira takava Shoko; takangobva tava munhu wenyama, tisina kutanga tava Shoko.

Asi, uye mutarire, zvinonyanya kuzvijekesa, haugoni kuva Shoko kunze kwokunge waiva pfungwa Yake pakutanga. Izvi zvinosimbisa nyaya yokufanotemera KwaMwari. Mazviona? Haugoni kuva Shoko kunze kwekukunge waiva pfungwa. Waifanira kuvemo mupfungwa Dzake, pakutanga kwazvo. Asi,

unoona, kuti ugone kurwisana nekuedzwa, waifanira kuchirika mutumbi wako WeShoko. Waifanira kuburukira pano uri munyama, kuti uyedzwe nechivi. Uyewo, kana wakunda, "Vose vandakapiwa NaBaba vachauya KwaNdiri, uye Ndichamumutsa mumazuva okupedzisira." Maona, waifanira kutodaro kutanga.

33 Asi, munozviona, Iye Akaburukira pano, nenzira inofanira, kubva mukuva chizenga kuenda . . . Nheyo dzenyika dzisati dzavambwa, Zita Rake rikanyorwa MuBhuku YeGwayana YoHupenyu. Uye, kubva pane izvi, Akva Shoko, mutumbi WeShoko, waizviratidza kuti uonekwe wonyangadikazve. Uyewo Akazova nyama uye Ndokudzokerazve, Akamutsa kubva kuvali mutumbi mumwechetewo wava muchinhanho zvino chokubwinyiswa.

Asi iwe wakachirika chinhando chokuva mutumbi WeShoko uye ukabva wangova munhu wenyama, kuti ugoedzwa nechivi. Uyewo, "Kana tabhenakeri iyi yepanyika ichinge yanyungudika, tinayo imwe yakatimirira nechekare." Hatisati tapinda mumitumbi iyi.

Asi, mutarire! Mutumbi uno kana uchinge wagamuchira Mweya WaMwari, ihwo Hupenyu Hwusingafi mukati mako, zvinoisa mutumbi uno pasi mukuteerera Mwari. Hallelujah! "Uyo akaberekwa NaMwari haachaiti chivi; haagoni kuva nechivi." VaRoma chitsauko 8 ndima 1, "Zvino naizvozvohakuchina kupomerwa kune avo vari munaKristu Jesu; havafambi nezvidikwa zvenyama, asi muzvidikwa ZvaMweya." Mazviona manje. Maona, zvinoisa mutumbi wako pasi pokuteerera.

Hauchatauri uchiti, "Oh, dai ndikagona kusiya kunwa! Dai ndikagona ku . . . "Pinda munaKristu bedzi, uye zvose zvinoenda, maona, maona, nekuti mutumbi wako wava pasi mukuteerera Mweya. Hauchisiri pasi pokuteerera zvinhu zvenyika; zvakafa kare. Zvakafa kare; zvivi zvako zvakavigwa mukubhabhatidza, uye iwe wava chisikwa chitsva munaKristu. Uyewo mutumbi wako, uchiva pasi mukuteerera Mweya, unoedza kurarama mhando yohupenyu.

34 Sezvamunoita imi vakadzi vanopupura kuti makawana Mweya Mutsvene, asi moenda kunze uko uye muchipfeka zvikabudura uye nezvimwe zvakadaro, mungazvigona sei izvi? Ko Mweya WaMwari Angakuregai sei muchiita chinhu chakadaro? Hazvigoni kuti zvidaro. Chokwadi, hazvigoni. Iye Haasi mweya wakaipa; Iye Ndiye Mweya Mutsvene.

Zvino kana uchinge wava pasi mukuteerera Mweya Uyu, zvinoisa hunhu hwako hwose pasi mukuteerera Mweya Iyeye. Uyewo Mweya Uyu Haasi zvinhu zvenyika asi Ndiye Shoko Iri muchimiro CheMbeu Raratidza, kana kumutsiridza, hallelujah, kuitwa Benyu. Uye apo Bhaibheri paRinoti, "Usaita icho," mutumbi uyu unokasira kumhanyira Kwaririri. Pasina mubvunzo pazviri.

Uye chimbori chii zvino? Ndirwo rubatso rwerumuko. Mutumbi uno unomutswazve, nekuti wakatanga kare. Waimbenge uripasi mukuteerera chivi, uye uri mudope guru pamwechete nokuora, asi ikozvino wava norubatso; wakashanduka kuva weDenga. Zvino, ndirwo rubatso rwokuti unoenda muKubvutwa. Ndirwo rubatso.

Murwere avete, achifa, pasina chimwe chasara kunze kwokufa; zvirizvo zvoga zvasara. Ndakaona vanhu vaita semimvuri, vadzyiwa-dyiwa negomarara uye norurindi; uye ndokuona vanhu vamwechetevo, mushure mechinguva, vadzokanidza zvakakwana uye vava nesimbazve. Kana kupodza KwaMwari kusisiko, zvinoreva kuti hakunawo rumuku kubva kuvakafa, nekuti kupodza KwaMwari ndirwo rubatso rwerumuko kubva kuvakafa. Amen!

Mari inopiwa sorubatso munoiziva, handizvo here? Ndiyo inopiwa sechibatiso. "Iye Wakakuvaldzirwa kudarika kwedu; namavanga Ake takapodzwa." Muchherechedze kuti zvakanaka sei! TinoMuda Iye.

35 Zvino, mutumbi uno uripasi mukuteera Mweya. Hausati wapinda muchimiro CheShoko, asi tichiri muchimiro chenyama, asi uri pasi mukuteerera Shoko. Kufa kubva kune zvenyama kunotisvitsa apa.

Ndicho chinhu chimwechete, ukafunga maringe nomwana mucheche. Unogona kutora mudzimai upi zvake, zvisinei nohuipi hwake, kana achinge akazvitakura uye ava pedo nokusununguka. Utarire, mwana iyeye asati aberekwa, handina basa nokuti mudzimai uyu anehutsinye hwakadii, panguva iyi anova munhu wetsiye nyoro. Panechimwe chinhu paari chinoita . . . chinoratidza HuMwari, kuona amai vaduku ava vava pedo nokuva mai, mukuberekwa kwomwana. Sei zvichidaro? Kamutumbi kaduku ikako, zvino, hakasati korarama, maona, kachingori churu chenyama nemarunda. Kakupfanha-pfanha kaye, kufamba kwamarunda awa. Asi kanoti kabuda kubva muchizvaro chaamai, Mwari Anofemera rufemo rwoupenyu makari, uye iko kobva kazhambatata. Maona, sokubatika kwazvo maringe nokuumbwa kwomutumbi wenyama, ndizvo zvazviriwo kuti uripo mutumbi wemweya unokagamuchira munguva duku yakanouya pano.

36 Ipapo, kana munhu abarwa patsva, kubva KuDenga, anova rusvava munaKristu.

Uyewo, ipapo, kana hanzu wenyama iyi yaraswa, uriko mutumbi wenyama, mutumbi WeShoko, mutumbi usina kuumbwa noruoko rwenyama, kana kuberekwa nomukadzi, uyu watinoenda kwauri.

Ipapo mutumbi uyu unodzoka uye wotora mutumbi wakabwinyiswa.

Ndicho chikonzero Jesu Akaenda gehene pakufa Kwake, uye Akandoparidzira kumweya iri mutirongo; akadzokerazve mumutumbi WeShoko. Oh, zvakanakisa izvi! Tinotenda Mwari!

Vakorinde vechipiri chitsauko 5 ndima 1, "Kana tabhenakeri iyi yepanyika yanyungudika, tabhenakeri iyi yepanyika, tine imwezve." Maona, takaichirika iyi, ndokubva KuNaMwari takananga pano, kubva muchizenga; kuzova nyama, kuti tigoyedzwa nokuzamiwa nechivi, sezvaitwa Adhamu. Asi kana kuyedzwa NeShoko Rake kwapfuura, ipapo tinotakurwa kuenda mumutumbi uyu watakagadzirirwa nheyo dzenyika dzisati dzavambwa. Ishoko apo Ratakachirika, kuti tipoterere nokuno, pano pasi kuti tigoyedzwa uye nokuzamiwa. Dai takauya nemaUri, hazvaigona kuti kuve nokuyedzwa; taizoziva zvinhu zvose. Ndicho chikonzero Jesu Aiziva zvinhu zvose, nekuti Akava Shoko Asati Ava nyama. Ipapo tinozova Shoko.

Pano takaumbwa muchimiro CheShoko, kuti tive vagoverani PaShoko, tidye PaShoko, mukufanotemerwa kubva pamavambo; waona kamoto kaduku KoHupenyu kari mauri aka kubva kumavambo, munguva yawakatanga rwendo rwako. Vazhinji venyu munozvirangarira. Wakabatana nekereke iyi uye ndokubatana nekereke iyo, waizama ichi neicho; asi hakuna chakakupa kugutsikana. Ndizvozvo. Asi rimwe zuva wakagona kuRicherechedza. Ndizvo.

37 Pane umwe usiku ndine kwandaizidzisa, ndinofunga kuti kkwaiva kunze uko California kana kuti Arizona, pamusoro pe . . . Ndinotenda kuti karungano kacho ndakakataura pano, pamusoropo murume aive nehuku sheshe yairarira mazai uye ndokuisa zai rechapungu pasi payo. Zvino chapungu pachakatsotsonyiwa, chaiva shiri inosetsa isati yamboonekwa nehuku. Asi, chaifambawo kwose-kwose. Chaiva chaka-chakashata kupinda dzose pakati padzo, nokuda kwekuti hachina kugona kunzwisia kuti nemhaka yei sheshe yaiita ruzha rwayo uye nokuteta pamarara omufudze uye dzodyapo. Hachina kugona kujekerwa nepfungwa yacho. Sheshe yaiti kwachiri, "Huya kuno uye uzodya, Mudiwa!" Asi, chaiva chapungu; chakanga chisingagoni kudya saizvozvo. Chikafu ichi chaisava chachinodya.

Naizvozvo sheshe yaibata mhashu uye nezvime zvakangowanda-wanda, munoziva, uye yaidana hukwana. Uye hukwana dzose dzaiitevera, nokuva nomuririro wadzo pamwechete, uye dzichidya. Asi kachapungu kaduku aka hakana kuzvigona kuzviita. Zvairatidza kusava-kusava sezvine musoro kwachiri.

Rimwe zuva amai vacho vakauya nepo vachichivhima.

38 Uye chainzwa sheshe yorira nomuriro wayo. Chaizamawo kurira somuririro wehuku, asi hachaigona kudaro. Maona, chaiva chapungu. Icho, pakutanga kwazvo, chaiva chapungu. Chakangotsotsonyiwa bedzi pasi pehuku sheshe.

Ndizvo zviri dzimwe nhengo dzekereke. Vose . . . Ndizvo zvazvinongova; pamusoro pouyo anemutsauko nerimwe boka rose, ndizvozvo. Asi rimwe zuva amai vacho vakabfururuka napamusoro penzvimbio iyi, uye vakadanidzira. Chakagona kucherechedza madanidziro aya. Zvakapa ruzha kwarwo. Nemhaka yei? Chaiva chapungu, pakutanga kwazvo.

Ndizvovo zvazviri neIvhangeri Iyi, kana kuti NeShoko, kana kuti Simba RaJesu Kristu. Kana munhu akafanotemerwa kuHupenyu Husingsperi, anonzwa ruzha kwarwo, kunova kudanidzira KwaMwari, hakuna chinhu chingagona kumudzivisa kubva PaKuri.

Kereke inogona kutaura ichiti, "Mazuva eminana akapfuura," kwiyo, kwiyo, kwiyo. "Mira necheapa uye udye ichi, uye mira nepapa uye udye icho."

Zvinhu izvi zvemuzumbo rehuku hazvichamuitiri zvakanaka, zvachose. Iye watoenda! "Zvinhu zvose zvinogoneka!" Iye anobhururuka kubva pasi apa.

Ndicho chikonzero, riri dambudziko namaKristu mazhinji anhasi, havakwanisi kusimudza tsoka dzavo kubva pasi apa.

Amai chapungu ava vakati kwachiri, "Mwanakomana, kwakuka! Uri chapungu iwe. Kwidza kumusoro kuno kwandiri."

Icho ndokuti, "Amai, handina kumbobvira ndakakwakuka muhupenyu hwangu."

Amai ndokuti, "Zvakanaka, iwe kwakuka chete! Uri chapungu, pakutanga kwazvo. Hausi huku iwe." Saka chakabva chakwakuka kwokutanga uye ndokurovanisa mapapiro acho; hazvina kusvika pachiero chinofadza, asi chakagona kusimuka kubva pasi apa.

Ndiwo maitiro edu pazvinhu. Tinogamuchira Mwari nokutenda, kuburikidza NesShoko Rakanyorwa. Chiripo chimwe chinhu imomo; ndihwo Hupenyu Husingaperi. Wakafanotemerwa kwahwuri.

Sekuru nambuya vacho vaiva zvapungu. Icho chaiva chapungu, nzira yose kudzokera shure.

Zvapungu hazvizvisanganisi nezvimwe zvinhu. Hachisi musanganiswa; kwete. Icho chapungu.

39 Ipapo, mushure mokucherechedza kwako kuti Shoko Iri RaMwari Ndiro Chikafu CheZvapungu, wakabva wasiya zvime zvinhu zviya zvakare. Ipapo zvino wakanga waberekwa kupinda muchimiro chinorarama ChaMwari Anorarama. Wakanzwa kubva kumutumbi wako WeShoko. "Kana tabhenakeri iyi yepanyika yanyungudika, tinayo imwe yakatimirira."

Iwe woti, "Ichokwadi here ichi, Hama Branham?"

Zvakanaka hazvo, regai titore zvapungu zvishoma-shoma uye tigozviongorora kwamaminitsi mashoma-shoma. Kwaiva nezita, murume ainzi Mozisi. Munhu wose anozviziva kuti vaporofita vose vanodanwa kunzi zvapungu, muBhaibheri. Kwakanga kuine muporofita ainzi Mozisi. Uye rimwe zuva Mwari Akamudaidza, uyewo Haana kuzomutendedza kuti ayambukire mhiri kunyika iyo, uye iye-iye wakazofira paibwe. Vatumwa VaMwari ndokuuya kuzomutora uye vakandomuviga. Pakavawo nomwe murume, aiva chapungu, haaifanira kufa. Akangofamba ndokuenda mhiri kwaJorodhani, uye Mwari Ndokutumira karichi pasi pano; uye ipapohanzu iyiyenyama yakaraswa, uye iye ndokutakurwa uye ndokundobata mubairo usingaperi.

Makore mazana masere mbere kwazvo, makore mazana masere mberi, paGomo Rokushandurwa, havano varume vaviri ava vakamirapo. Mutumbi waMozisi wakanga waora kare kwemazana namazana amakore, asi heuno aiva apa murume uyu ari muchimiro chokuti kunyangwe Petro, James naJohani vakagona kumuziva. Ameni! "Kana tabhenakeri ino yepanyika yanyungudika," kana wakava chizenga ChaMwari chakaratidza pano panyika, "unawo mutumbi wakakumirira kuti ubude munyika ino." Havo vaipo apo, vamire paGomo Rokushandurwa, vari mumitumbi yavo YeShoko. Nekuti, vaiva vaporofita vakavingwa kwavari NeShoko RaMwari.

40 Uyewo regai ticherechedze mumwe muporofita, pane imwe nguva, zita rake ainzi Sameri. Aiva munhu anechiremera chikuru. Akanga adzidzisa Israeri; ndokuvaudza kuti vasava noumwe mambo. Iye ndokuti, "Ndine here chinhu chimwechete chandakataura kwamuri MuZita RaIshe chikarega kuzadziswa?"

Ivo vakati, "Kwete. Zvose hazvo zvawakatura kватiri MuZita RaIshe zvakazadziswa."

Akanga ari muporofita, uyewo akazofa.

Kwapera makore matatu kan kuti mana, mambo akapinda pakaoma; nguva idzi Ropa RaJesu rakanga risati radeurwa. Akanga ari paradhisso hake. Uye muroyi uyu weku-Endor akadana mumwe munhu kuti auye kuzonyaradza Sauro. Zvino muroyi uyu akati achimuona achisimuka, akabva ati, "Ndinoona mwari muduku achisimuka kubuda panyika."

41 Uye mushure mokunge murume uyu afa, ndokuvigwa, uye ndokuora ari mubwiyo, heuno zvino akanga kamirazve mubako, achiri akangopfeka hanzu dzake dzouporofita; uye akanga achingori muporofita, ameni, nekuti iye akati, "Ko nemhaka yei wandidaidza kubva munzvimbio yangu yokuzorora, uchiona hako kuti iwe wava mhandu YaMwari?" Tarirai achiporofita. "Mangwana Manheru, nenguva dzino, uchava pamwechete neni." Akanga achiri muporofita, kunyangwe akange abuda mumutumbi wake wenyama.

Maona, akanga afanana apa uyewo nokuva chikamu CheShoko, uye iye akabva muhupenyu huno hwennyama ndokundopinda chaimo mumutumbi uyu waakanga akagadzirirwa nheyo dzenyika ino dzisati dzavambwa. Iye akandopinda mumutumbi wake WeShoko, unnova Shoko. Mazvibata here? Ndiko kunoendwa navatendi vose kana tichinge tabva pano.

Zvino, muchimiro ichochi, chidzitiro chinobviswa. Mazviona, wava Shoko zvino, uyewo, paunopinda mukati mawo. Sezvinota kacheche; sokutura kwangu nguva yadarika . . .

Zvino mucherechedze. Mwari Arumbidzwe nokuda kweZvisimbiso zvirikuzaruka izvi, wagara munamato wangu, kuti ndigoziva zvinhu izvi!

42 Zvino chizaruro chechokwadi pamusoro PaMerikizedheki chavakuoneka zvino. Aivei? Aiva Mwari, Iro Shoko, Asati Ava nyama; Mwari, Iro Shoko. Nekuti, Aifanira kuva saizvozvo; nokuti hakuna mumwe asingagoni kufa SaIye. Maona, ndaiva nababa namai; newewo, zvakare. Jesu Aiva nababa namai. "Asi Murume Uyu Akanga Asina baba, kana amai." Jesu Akava nenguva yamavambo; Murume Uyu Akanga Asina. Jesu Akapira hupenyu Hwake kuti Afe; Murume Uyu Akange Asingagoni kudaro, nekuti Aiva Hupenyu Pachake. Uye Ndiye Murume Mumwecheteyo panguva dzose idzi. Ndinovimba kuti Mwari Achakuzarurirai. Munhu Mumwecheteyo, nguva dzose.

Mucherechedze Madunhurirwa Ake, "Mambo Wokururama." Zvino, VaHebheru chitsauko 7 ndima 2, "Mambo Wokururama, uye Mambo Worugare." Ndiye madzimambo maviri awa. Zvino mutarisise, VaHebheru chitsauko 7 ndima 2, "Mambo Wokururama, uye Mambo Worugare." Ndiye madzimambo maviri awa apa. Zvino nokuda kwokuti Akauya munyama uye Ndokuzogamuchira mutumbi Wake Kumusoro, muna Zvakazarurwa chitsauko 21 ndima 16, Anodaizwa kuti, "Ndiye Mambo wemadzimambo."

Chinhu chimwechete, sezviri munhu womukati, mutumbi, uye nomweya, zvoze zvinoumba chinhu chimwechete.

Uyewo, Ndiye Baba Vakavapo pokutanga; NoMwanakomana; uyewo NaMweya Mutsvene, Iye Mweya. "Mambo Wokururama," chizenga ChaMweya; mutumbi WeShoko, "Mambo Wo-Worugare," mutumbi WeShoko; uyewo Ari munyama Aiva "Mambo wemadzimambo," Munhu Mumwecheteye.

43 Apo Mutumbi WeShoko, PaAkaonekwa naMozisi, Eksodho chitsauko 33 ndima 2, Aiva Mutumbi WeShoko. Mozisi aida kuona Mwari. Akanga anzwa Inzwi Rake, akaMunzwa Achitaura naye, akaMuona pagwenzi apo, SeShongwe YeGore ReMoto Huru. Uye iye ndokuti, "Ndimi Aniko? Ndinoda kuziva kuti Ndimi Ani." Mozisi akadaro. "Ndichaisa . . ." "Kana mukanditendera ndikuoNei, ndinoda kuona huso Hwenyu."

Iye Akati, "Hakuna munhu ungaona huso Hwangu." Iye Ndokuti, "Ndichavhara huso hwako noruoko Rwangu, uye Ndigopfuura nepauri. Uyewo unogona kuona musana Wangu, asi kwete huso Hwangu." Maona? Uye Akati Aita seizvozvo, akaona musana WoMunhu; Waiva Mutumbi WeShoko. Aiva Shoko Rakauya kuna Mozisi Richiti, "NDIRI," Raiva Iro Shoko. Shoko Rakauya kuna Mozisi muchimiro CheShongwe YeGore Remoto Yaiva pagwenzi rinopfuta, Iye "NDIRI."

Seshoko kubva kufundho dzeBhabheri . . . muchimiro ChoMutumbi WeShoko, ndinoreva kudaro. Mundiregerere. Akanya kuna Abhurahama SoMunhu, paakange agere pasi pomuti womu-oak. Zvino tarirai chinhu ichi. Kwakauya Munhurume Uyu kuna Abhurahama, vari vatatu, uye ndokugara pasi pomuti womu-oak, vari vatatu. Uyewo mucherechedze, mushure mokupedza Kwake kutaura naAbhurahama . . .

44 Akanga Auya nokuda kwaani? Abhurahama, ariye akange aine vimbiso uyewo nemharidzo yomwanakomana anouya, uyewo zvakare aiva muporofitaWeShoko RaMwari aivimba MuShoko RaMwari, achiona zvoze zvinopesana sezvisipo. Maona kukwana kwakaita Shoko? Shoko Rakauya kumuporofita. Maona, heuno Mwari muchimiro Chemutumbi WeShoko. Uye Bhaibheri Rakati, "Shoko Rinouya kumuporofita." Uye hero Shoko Raiva apo Riri Mutumbi WeShoko.

Imi moti, "Aiva Mwari here Uyu?" Abhurahama akazvitsigira. Akataura Zita Rake, kuti, akaMudaizda kuti Elohim. Zvino muna Genesi Chitsauko 1, unoona kuti, "Pakutanga Elohim Akasika denga nenyika." Muna Genesi Chitsauko 18, tinoona kuti-kuti Abhurahama akadaidza Munhu Uyu . . . Akagara uye nokutura naye, uye Akagona kumuudza zvakavanzika zvemumoyo wake, nokumuudza zvakafungwa naSarah aiva seri Kwake. Abhurahama ndokuti, "Uyu NdiElohim." Akanga Ari muchimiro Chemutumbi WeShoko. Mazvibata here? Mucherechedze mushure . . .

45 Zvino tinoona kuti Aiva Mutumbi WeShoko ipapo. NdokuMudaizda Iye achiti, "Ishe Mwari, Elohim." Zvino, muna Genesi Chitsauko 18, tinoona kuti ndezve chokwadi.

Zvino cherechedzai Abhurahama. Vaiva vatatu pamwechete, asi Abhurahama paakasangana navo vatatu ava, Akati, "Ishe wangu."

Asi Roti, ari zasi muSodhoma; vaviri vavo vakaenda zasi ikoko, uye Roti akati achiona vaviri vavo ava vachiuya, uye iye akati, "Madzishe wangu." Maona dambudziko raiva papi? Chekutanga, Roti akanga asiri muporofita, ndizvozvo chaizvo, kana kuva nhume yenguva, saka akanga asina chizaruro pamusoro Pake. Ndizvozvo chaizvo. Roti akati kwavari "madzishe." Kunyangwe nomuwandiro upi zvavo, angozovadana achiti, "madzishe."

Zvisinei nekuti Abhurahama akanga aona vangani, Aingova Ishe Mumwechete. Heuno Mwari. Uyu Ndiye Aiva Merikizedheki.

Mucherechedze, mushure mekunge hondo rapera, Merikizedheki Akapa mwanakomana Wake akanga akunda chirairo; imbozvifunga, chikamu Chake Iye Pachake! Zvino tinoda kuona chinhu ichi chiru pano. Mumumvuri apa pane, mukuonekwa kwazvo, icho chirairo. Mushure mehondo, Akazvipa Iye Pachake, nokuti chirairo chikamu ChaKristu. Uye mushure mokupera kwehondo, wapukunyuka mukurwadza kwehondo, kana zvadaro waakugona zvino kudya mutumbi WaKristu, wobva wava chikamu ChoMunhu Uyu. Mazvibata?

46 Jakobho akaita mutsimba husiku hwose, uye haana kuMurega Achienda kusvikira Amuropafadza. Ndizvozvo chaizvo. Akarwira Hupenyu! Uye mushure mokupera kwehondo, ipapo Mwari Anozvipa Iye Pachake kwauri. Ichi ndicho chirairo Chake Iye chechokwadi. Kachingwa kaya kaduku uye kachimedu kaya kanomirira chirairo Chake. Haufaniri kuchitora kusiya kwokunge warwa hondo ukakunda uye wava chikamu ChaMwari.

Murangarire, kuti panguva iyi, chirairo chakanga chisati chapiwa somurairo, kwete kudakara Jesu Kristu Asati afa, makore mazana namazana akazouya mberi.

Asi Merikizedheki, mushure mekunge mwana Wake Abhurahama akunda mukukunda, Merikizedheki Akasangana naye uye akamupa waini nechingwa; zvichiratidza kuti mushure mokupera kwehondo

yepanyika pano, tichanosangana Naye muchadenga uye totora chirairo zvakare. Uchange uri Muchato WeGwayana. "Handizonwizve pamuto wamamzambiringa, kana kudya zvibereko zvawo, kusvikira munguvayaNdichadya uye nokunwa pamwechete nemi, patsva, MuHuMambo HwaBaba Vangu." Ndizvo here?

47 Mucherechedze zvakare, Merikizedheki Akaenda kundochingura Abhurahama asati asvika kumba kwake. Mumvuri wakanaka zvakadini watiinawo pano! Merikizedheki Achichingura Abhurahama asti asvika kumba kwake, mushure mokupera kwehondo.

Tinosangana NaJesu mchadenga, tisati tanosvika Kumusha. Ndizvozvo chaizvo. vaTesaronika vechipiri inotiudza kuti, nekuti, "tinosangana Naye muchadenga." Mumvuri unoropafadza waRabheka achindosangana naIsaka, mumunda, munguva dzokutonhorera kwezuva. "Tinosangana Naye muchadenga." VaTesaronika vechipiri inotiudza saizvozvo. "Nokuti isu vapenyu vanenge vachiripano hatinga dzivisi kana kumira munzira yeavo vavete; nekuti hwamanda YaMwari icharira; uye vakafa munaKristu ndivo vachatanga kumuka; isu vapenyu vanenge vachiri pano tichabvutwa pamwechete navo, kuti tisangane Naye muchadenga." Yakazvikwanira, mimvuri yose iyi.

Naizvozvo, mutumbi WeShoko, kana uchinge wafa unonopindawo mumutumbi wako uyu WeShoko, (chii chinoitika?) mutumbi wako WeShoko unouya pano panyika kuti uzotora mutumbi wako uyu wakadzikingurwa. Zvino kana wava munzvimbo iyi yomuchadenga, unotora mutumbi uyu kuti usangane nemutumbi wako WeShoko, mazviona manje, "uye tichabvutwa, uye tigoenda kundosanana NaIshe muchadenga."

Angagova Aniko Merikizedheki Uyu kunzwe KwaMwari!

48 Zvino pano tinonyatsoona mufananidzo wakakwana wedu tiri murwendo, uyewo kufa kwedu, uyewo kwatinoenda mushure mokufa. Zvakare, kufanotemerwa kwakanyatsojeka apa. Zvino munyatsoteerera zvatava kudzidzisa izvi, kunyatsoteerera.

Zvinhanho zve-zvechinangwa Chake cheZienda-nakuenda chakavanzika chaaiva nacho chazarurwa zvino. Mucherechedze, pachine zvinhanho zvitatu zvokusvika mukukwaniswa. Sokudzikingura KwaAkaita nako nyika; ndio nzira imwechete YaAno dzikinura nayo Kereke. Iye Anodzikinura vanhu Achishandisa nhanho nhatu. Zvino chitarisai. Nhanho yokutanga ndiko kururamiswa, sokuparidza kwakaita Luther; nhanho yepiri ndiko kucheneswa, sokuparidza kwakaita Wesley; nhanho yetatu ndirwo rubhabhatidzo RwaMweya Mutsvene. Ndizvozvo chaizvo. Ipapo Kubvutwa Kwobva Kwauya!

Zvino, nyika, Akaidzikingura sei nyika? Chokutanga, icho Akaita, payakanga yatadza, Akaisuka kubva mukutadza norubhabhatidzo rwemumvura. Ndizvozvo chaizvo. Iye Ndokubva Adonhedzera ropa Rake pamusoro payo, pamuchinjikwa, uye Ndokuichenesa uyewo akaidana kuti yava Yake. Mberi kwaizvozvo Anozoitei? PaAno bvarura nyika ibude mauri, uyewo anovandudza patsva chinhu chose ichi nomoto unopisa worubhabhatidzo RwaMweya Mutsvene, Iyewo Achavandudza patsva nyika ino. Uyewo ichapfutiswa NoMoto, uchasuka hurwere hwose, uchikwidza mamirioni amamayera kuenda mudenga, zvose hazvo zvichasukwa zvibve. Uye ipapo pachva NeDenga Idzva uyewo NeNyika Itsva, sezvuri kuti wakava chisikwa chitsva munaKristu ipapo Mweya Mutsvene PaAkakubata. Maona, mazviona manje, nyaya yacho yose yajeka nokujeka kukuru. Zvinhu zvose zvinofamba muhutatu.

49 Kuberekwa kwapanyama kunofamba muhutatu. Chinhu chokutanga chinoitika kumudzimai akzvitakura chii? Chii chinotanga kudzutuka? Mvura. Chii chinotevera kudzutuka? Ropa. Chinhango chinozotevera ndechipi? Hupenyu. Mvura, ropa, mwuya.

Chiiko chinoitika kuchirimwa? Chinoora. Chinhu chokutanga kuitika chii? Shanga. Chii chinozotevera? Muchekechera. Ko chinozotevera? Gwande. Zvino tsanga yembeu inozobuda ubva munevvizvi. Nhanho nhatu dzazvo, kudakara tsanga yembeu yatzokazve. Ndizvozvo chaizvo.

Mwari Anozvisimbisa izvi. Zvakagara zvirizvo. Mwari Anozvisimbisa kuti ichokwadi. Zvoratidza pachena, kuti vakafanotemerwa ndivo voga vano dzikinurika. Mazvibata here? Regai ndizvitaure zvakare. Vakafanotemerwa ndivo voga vanodzikingurika. Vanhu vanogona kuita sokunge vangadzikingurwa, kana kufunga kuti vakadzikingurwa, asi rudzikinguro chairwo nderwe vakafanotemerwa. Nekuti, shoko rimwechete rokuti kudzikingura rinoresa kuti "kudzosa munzvimbo." Ndizvozvo here? Kudzikingura chimwe chinhu . . . Kudzikingura chipi nechipi, ndiko, "kudzosa chinhu ichi munzvimbo yacho yapamavambo." Hallelujah! Saka ndevaya vakafanotemerwa vanodzoswa munzvimbo, nekuti vamwe vaya havabvi KuNzvimbo Iyi. Maona, "kudzosa munzvimbo!"

50 Tiri veZienda-nakuenda pamwechete Naye, pakutanga . . . Hupenyu Husingaperi Hwawaiva naHwo, pfungwa Yake pamusoro pazvawaiva, chinhu choga, Iye chaAida kuti iwe uve . . . Aida kuti ini ndigomira papurupeti, tomboti. Iye Aida kuti iwe ugare muchigaro chaugere Manheru ano. Kana zvadaro tiri kushumira chinangwa Chake CheZienda-nakuenda. Ndizvo here? Zvakanaka. Ipapo, mushure mokunge wapedzwa nawo, unodzoswa wava muchimiro chokubwinyiswa; wasamhuka zvino uye wodzoswazve.

Chikonzero Pauro aitaura achidaro, pavaiumbiridza nzvimbo yakakwirira yokuti vadamburire musoro wake; iye akati, "O rufu, rumborera rwako rwrip? O iwe bwiyo, kukunda kwako kuripi? Asi Mwari Atendwe Iye Anotipa kukunda!" Iye ndokuti, "Rufu, ndiudze chaungandichemedz nacho! Bwiyo, ndiudze kuti uchakwanisa sei kuramba wakandibata! Nekuti, ndiri mudyi wenhaka KuHupenyu Husingaperi." Ameni! Akazvicherechedza. Rufu, gehena, bwiyo, hakuna kana chimwechete chazvo chaigona kumubata. Uye hakuna kana chimwechete hach chingatikuvadza, tine Hupenyu Husingaperi! Iye akazvicherechedza kuti akange aine ropafadzo yoHupenyu Husingaperi.

51 Sezviri donhwe redova. Kana ndiine kunzwisia pazviri, rino . . . Handina zvizhinji zvandinoziva pamusoro pe-Chemistry. Asi, rinofanira kunge rakaumbwa nokubatana pamwechete kwohunyoro hwemumhepo kana munharaunda. Zvino usiku hunoti hwatonghara uyehwava nerima, donhwe iririnodonha kubva mumatenga uye rowira pasi. Rine nzvimbo yarinodonha richibva. Asi mangwanani anotevera zuva risati rabuda, rinenge rigere zvaro apo, kamuchindakaduku ikako, kachidedera nechando. Asi rega zuva ringobuda, unoona kotanga kupenya. Kane mufaro. Nemhaka yei? Zuva richakadzidza kadzokere ikoko chaiko kwakakabva.

Uyewo ndizvo zvazviri noMuKristu. Hallelujah! Tinozviviza kuti patinofamba tichipind MuHupo HwaMwari, pane chimwe chinhu matiri chinotiuza kuti takabva kkune imwe nzvimbo, uyewo tinodzokerako kuburikidza NeSimba Iri Rinotikweva.

Kadonhwe kaduku aka kedova, kanohwinya uye kupenya uyewo nokudanidzira, nekuti kanoziva kuti kakabva kumusoro uko, iro zuva richakakweva kuti kakwidzevze kudzokera kumusoro.

Uyewo munhu ari chizenga ChaMwari, akaberekwa NaMwar, anozviviza, hallelujah, kana achinge apinda mukubatana NoMwanakomana WaMwari, kuti achakweverwa kuenda kumusoro achibva pano rimwe zuva. "Nokuti kana Ndichinge Ndzsimudzwa kubva panyika, Ndichakwevera vanhu vose KwaNdiri." Ameni!

52 Zvino chicherechedzai, zvino, tinoona zviri Merikizedheki Uyu uyewo nokuona chikonzero Maria akanga asiri amai Vake. Ndicho chikonzerza Akatura kumudzimai uyu achiti "mudzimai iwe," kwete kuti amai Vangu. "Akanga Asina Baba," nokuti Iye Ndiye Aiva Baba, Baba Vasina magumo, zvitatu izvi MuMunhu Umwe. "Akanga Asina amai," zvirokawazvo kwete. Akanga Asina baba, nokuti Iye Ndiye Aiva Baba. Sokureva kwomunyori pane imwe nguva, achitaura chitanakisa pamusoro PaJesu, iye akati:

NDIRI Akatura kuna Mozisi pagwenzi raipfuta nomoto,

NDIRI Ndiye Mwari waAbhurahama, iyo Nyeredzi Yokupenya Yamangwanani.

NDIRI NdiyeAlpha, Omega, mavambo nokuguma.

NDIRI Ndiye husikwa hwose, uye Jesu ndiro Zita Rake

(Ndizvozvo chaizvo.)

Oh, ko imi munoti NDIRI Ndiani, uyewo vanoti Ndakabvepi,

Baba Vangu munoVaziva here, uye munozivawo here Zita Ravo? (Hallelujah!)

Ndiro Zita RaBaba! Hongu, "Ndakauya MuZita RaBaba Vangu, asiimi hamuna kuNdigamchira." Maona? Zvechokwadi, Ndiye mumwechete zuro, nhasi nokusingaperi.

53 Zvino Merikizedheki Uyu Akazova nyama. Akazvizarura Pachake SoMwanakomana womunhu PaAkaya, seMuporofita Mukuru. Akaya mumazita matatu oHuMwanakomana; Mwanakomana womunhu, Mwanakomana WaMwari, Mwanakomana waDhavhidi.

PaAkanga Aripayika pano, Aiva Munhu, kuti Azadzise Gwaro. Mozisi akati, "Mwari Ishe wenyu Achakumutsirai mumwe Muporofita akafanana neni." Saka Aifanira kuuya SeMuporofita. Iye Pachake HaAna, kubvira Ataura Achiti, "Ndiri Mwanakomana WaMwari." Iye Akati, "Ndiri Mwankomana womunhu. Munotenda here MuMwanakomana womunhu?" nekuti, ndizvo zvaAifanira kupupura nezvazvo, nekuti ndizvo zvaAiva.

Ikozvino Wauya Muzita rimwezve RoMwanakomana, Mwanakomana WaMwari; Iye Uya Asingaonekwi, Iye Mweya.

Uyewo PaAchadzoka zvakare, Anenge Ava Mwanakomana waDhavhidi, kutiAgogara Pachigaro Chake.

54 Zvino PaAkange Aripayo uye Aitwa nyama, Akadaidzwa kunzi, "Mwanakomana womunhu." Zvino, nyika yakaMuziva sei kuti Aiva Mwanakomana womunhu, Muporofita?

Rimwe zuva ndaitsanangura rungano rwPetro, Johani, munun'una wake. Vauva varedzi vehove, uye baba vavo Jona vakanga vari mutendi mukuru wakare-kare. Rimwe zuva ivo vanoti baba vavo vakagara

navo pasi murutivi rweigwa. Ndokutura vachiti, "Vanakomana, munoziva kunyengetera kwatakaita pataida kubata hove." Vaiva varedzi vehove vaitengesa zvikuru. Baba ndokuti, "Takavimba NaMwari, Jehovha, kuti tirarame. Uyewo ndavakuchembera zvino; handichagoni kuramba ndiinemi vakomana kwenguva refu. Uyewo nguva dzose, sokuita kwavatendi vechokwadi, ndakagara ndakatarisira nguva iyo ichauya Mesiya. Takaonamhando nemhando dzavo vana mesiya venhema, asi Arikuya Iye Mesiya WeChokwadi, nerimwe zuva." Uye ndokuti, "Kana Mesiya Uyu Achinge Auya, handidi kuti imi vakomana munge makanyengereka. Mesiya Uyu Anenge Asiri wefundho dzeBhaibheri. Achange Ari Muporofita, nekuti muporofita wedu Mozisi, anova ndiye watinotevera, akazvitura."

Zvino, muJudha upi neupi zvake anova nokutenda mumuporofita wake. Akadzidzisa kuziva zvinhu izvi. Uyewo kana muporofita uyu akatura zvinhu zvinozoitiki, zvinoreva kuti ichokwadi chaareva. Asi Mwari Akati, "Kna pakazova nomunhu pakti penyu, womweya, kana kuti muporofita, Ini Mwari Ndichazvizivisa Pachangu kwaari. Uyewo kana akatura chinhu chinozoitika, munzwei kureva kwake uye mumutye; as ikan zvikasaitika, zvino musamunzwa zvachose." Maona? Saka ndiko kwaiva-kwaiva kusimbisa kwomuporofita.

55 "Saka Mozisi akanga ari muporofita chaiye akasimbisa wechokwadi, uye iye akati, 'Mwari Ishe wenuy Achakumutsirai, kubva pakati penyu, kubva pakati pehama dzenyu, Muporofita akafanana neni. Uyewo vose vasingazoMunzwa Iye vachadimurwa kubva pakati pavanhu.' Iye ndokuti, "zvino, vanangu, murangarire, kuti, saVaHebheru, tinotenda muvaporofita VaMwari vakasimbisa. Zvino chinyatsoteererai. Musazvipotsa. Uye ndokubva ati, "Kana Mesiya Auya, muchaMuziva, nokuti Iye Achava Muporofita Ari Mesiya. Zvino, vanoti kwakapera makore mazana mana. Hatiana kunge tiine muporofita kubva nguva dzaMaraki, asi Iye Achava Muporofita!"

Rimwe zuva, mushure mokufa kwababa vavo, makore mashomanana apfuura, mwanakomana wavo Andreya aifamba zvake ari mhenderekedzo dzorwizi. Ndokubva anzwa mumwe murume wemasango akanga abuda murenje, achiti, "Mesiya Uyu Amire pakati penyu ikozvino!." Ichocco chapungu chikuru chakatambanudza mapapiro acho napamusoro perenje uye chikabhururuka nepanzvimbo iyi, ndokuti, "Mesiya Aripakati penyu ikozvino. Hatisati taMuziva bedzi, asi Iye Amire pakati penyu. Ini ndichaMuziva, nekuti ndichaona chiratidzo chichiburuka kubva KuDenga."

Rimwe zuva ndokubva ati, "Hero, tarirai, Gwaya RaMwari Rinobvisa zvivi zvenyika!"

Akabva apinda mu . . . munzira murume uyu, kundotsvaga mukoma wake. Iye akati, "Simoni, ndinoda kuti uuye neni kuno; Mesiya taMuwana."

"Oh, enda hako woga, Andreya! Unoziva zvirinani kudarika izvozvo!"

"Oh, ndinozviviza. Asika, izvi, Munhu Uyu Akasiyana navamwe vose."

"Arikupiko? Akabvepi?"

"Jesu weNazareta."

"Kubva mukaguta, kaya kaduku kanehuipi? Sei, hazvigonekuti Iye Abve munzvimbo youipi, munzvimbo iyi yakasviba yakadaro."

"Iwe chingouya uye uzvionere."

Pokupedesera akawanisa kumunyengeredza kuti aendeko rimwe zuva. Saka akati auya mberi KwaMesiya, Jesu Amire ipapo, Achitaura kuvanhu. Zvino paakafamba ndokumira mberi Kwake, Iye Akati, "Zita rako unonzi Simoni, uye uri mwanakomana waJona." Izvi zvakapedza nyaya yacho. Akawana makiyi KuHumambo. Nemhaka yei? Aizviziva kuti Murume Uyu Akange Asinga muzivi. Uyewo Akanga Amuziva sei, uyewo baba vake mukweguru vaiva NoHuMwari mavari vakange vamudzidzisa kuti Mesiya Anotendwa sei?

56 Pakanga paine murume akanga akamirapo, zita rake ainzi Firipi. Oh, akafadzwa nazvo zvikuru! Aiva nomumwe murume waaiziva, waainzvera naye Bhaibheri. Akabva apinda munzira, ndokupoterera kakomo, uye ndokumuwana ari mumunda wake wemiti yomuorivhi. Akanga akafugama pasi, achinamata. Vakanga vaita zvidzidzo zvakawanda zveBhaibheri pamwechete, saka wakabva abuda mumunda. Uye iye ndokuti, mushure mokupedza kunamata, iye akati, "Huya, uone Uyo watawana; Jesu weNazareta, mwanakomana waJosefa. Ndiye Mesiya watakatarisira."

Zvino ndinonza Nataniyeri achiti, "Zvinoka, iwe Firipi, hauna kupfuirira mwero uchipinda kunonyudza here, hauna kudaro here?"

"Aiwa, kwete. Kwete. Zvino rega ndikuudze. Unoziva, tanga tiri kunzvera Bhaibheri pamwechete, uye muporofita akati Mesiya Achange Akadini?"

"Achange Ari Muporofita."

"Unorangarira here muredzi wehove uya wawakatengera hove uya, asina kudzidza kwakakwana asinga goni kunyora zita rake, anonzi Simoni?"

"Hongu. Uh-huh."

"Akati auya ipapo. Uye unozivei? Jesu Uyu weNazareta Amuudza zita rake kuti anonzi Simoni, Ndokurishandura zita rake iri kutianzi Petro, zvinoreva "kabwe kaduku" uye ndokumuudza kuti baba vake vaiva ani."

"Zvakanaka," iye kадаро- iye ndokuti, "Handizivi hangu. Kune chakanaka here chingabuda muNazareta?"

Iye akati, "Ngatisataure nezvazvo; iwewe huya uye uzvionere." Ipfungwa yakanaka iyi, "Huya uye uzvionere."

Saka heuno Firipi, achiuya naNataniyeri. Uye paakasvika, Jesu zvichida Akanga Amire, zvichida Achinamatira varwere vaiva mumutsara wokunamatirwa. Zvino akati asvika paiva NaJesu, Jesu wakatarira pedo naye, uye Ndokuti, "Tarira muIsraeri asina nduru maari."

57 Zvino, imi moti, "Zvakanaka, chaiva chikonzeo chomupfekero wake." Oh, kweteka. Vagari vose venzvimbo dzokumabvira zuva vanopfeka nomupfekero mumwechete. Aigona kunge ari chizvarwa chavaSiriya, kana kubva chipi nechipi; zvaiva ndebvu, kana hanzu.

Iye Ndokuti, "Tarira muIsraeri asina nduru maari." Nemamwe mashoko, "munhu akatendeka, munhu anekurevesa."

Zvakanaka, izvi zvakaita kuti Nataniyeri aite seapera simba. Uye iyi akati, "Rabhi," zvinoreva kuti "mudzidzisi." "Rabhi, Mandiziva riinhi? Mazviziva sei kuti ndiri muJudha? Mazviziva sei kuti ndiri munhu akatendeka, asina nduru?"

Iye Ndokuti, "Firipi asiti akudaidza, pawanga uripasi pomuti, Ndakuona." Uh! Mamayera gumi namashanu kubva panzvimbo iyi, kune rumwe rutivi rworuwa, nezuro wacho."

Akati kudii? "Rabhi, Ndimi Mwanakomana WaMwari. Ndimi Mambo weIsraeri!"

58 Asika havano vaprista vaise vamire ipapo, vonozviidza kudaro, vaine kusindimara kwavo pachavo, vakati, "Murume uyu ndiBhezeribhabhu, muuki."

Jesu Akati, "Ndinokuregererai nokuda kwechinhu ichi."

Zvino, rangarirai kuti, havana kuzvitura zvinhu izvi mukunzwika nenzeve, asi vakazvitura mumoyo yavo. "Uye Iye Akanzvera pfungwa dzavo." Ndizvozvo chaizvo. Ndizvo zvinorehwa neBhaibheri. Munogona kuzvidaidza muchiti kuona zviri pfungwa nomuitiro wavanhu kana muchida henyu, asi Iye-Iye Akanzvera pfungwa dzavo dzemoyo.

Uye Iye Ndokuti, "Ndinokuregerera nokuda kwazvo. Asi nerimwe zuva Mweya Mutsvena PaAchauya uye Achiita zvinhu zvimechete neizvi," mushure mokunge Iye Aenda kumusoro; "kutaura shoko rinopesana Naye, hazvifi zvakazoregererwa panyika inokana nyika inouya mberi." Ndizvo here? [Ungano inoti "Ameni." -Ed] Zvino, ava vakange vari vaJudha.

Zvino rimwe zuva zvanga zvakakodzera kuti Iye Aende kuSamariya. Asi tisati tadar, takaona mumwe mudzimai ipapo, kana kuti mu . . .

59 Murume uyu, PaAkafuura nepasuwo rironzi Beautiful, uyo waAkapodza. Uyewo Jesu Achiziva Hake chinhando chomurume uyu, uye Ndokumuudza, "Takura nhoso yako uye uende kumba." Uyewo iye akazviita, uye akaporeswa.

Ipapo tinoona kuti, vaJudha ava, vamwe vavo vakaMugamuchira Iye. Vamwewo vakazvitenda; vamwewo havana. Nemhaka yei vasina kuzvitenda? Vakanga vasina kutemerwa Hupenu. Vakanga vasiri chikamu chechizenga ichochi.

Zvino murangarire, vanhu ava vajkanga vari vaprista uyewo vari varume vechiremerera. Uyewo Jesu . . . Imbozvifungaoi pamusoro pevafundhi ava veBhaibheri uye maprista aya, vanhu vawakanga usingagoni kuwanira mhaka muupenyu hwavo. Jesu Akati, "Muri vababa venyu dhiyabgori, uye mabasa ake ndiwo amunoita." Akati, "Dai maiva VaMwari, maizotenda Mandiri. Kana musingagoni kuNditenda Ini, chitendai ma- chitendai Mabasa awa Andinoita; nokuti anopupura pamusoro pokuti Ndiri Ani."

Zvino, Bhaibheri Rakati, "Jesu Ndiye mumwechete zuro, nhasi nokusingaperi." Jesu Akati, "Mabasa awa aNdinoita achaitwawo zvakare neuyo unotenda Mandiri." Ndizvo here? Mucherechedze, Akanga Ava Merikizedheki Anobatika zvino.

60 Zvino mucherechedze, zvakare, kwaingova nemhando nhatu dzamarudzi avanhu.

Makandinzwa ndichiti ndiri werusarura. Ndizvozvo zvanditori. MaKristu ose zvavo ndeve rusarura; kwete vasaruri veruvana rweganda, asi vasaruri vomweya. Ruvara rweganda romunhu harwunei nechokuita nezvaari. Iye mwan WaMwari kuburikidza noKuberekwa. Asi muKristu, Mwari Akati, "Ndipatsanurileyi!" "Budai kubva pakati pavo," uye nezvimwe zvakawanda. Iye Musaruri, wezvakaipa, pakati pechakanaka nechakaipa.

Asi mucherechedze, vakanga vainarwo rusarura kare ikoko, rusarura rweganda, vaiva vaSamariya.

Uyewo pane mhando nhatu dzavanhu panyika; kana tichitenda zvinorehwa neBhaibheri; rwonova rudzi, rwaHamu, rwaShemu, nerwaJafeti. Vanova vanakomana vatatu vaNoah. Tose takabuda mune ivava. Ndizvozvo chaizvo. Zvinoita kuti tose tirondeke kudzoka kuna Adhamu, zvinova zvinhu zvinotiita hama tose. Bhaibheri Rakati, "Kubva paropa rimwechete Mwari Akasika ndudzi dzose." Tose tiri hama nehama, kuburikidza neropa. Munhu wechitema anogona kuva neropa rake rinoisa mutsinga dzomunhu muchena, kana zvinopesana. Muchena anogona kuva neropa rake rinoisa mutsinga dzomunhu we-wekuJapan, kana munhu weganda reyero, kana mmunhu wechiIndia, kana munhu woruva rutsvuku, kana upi neupi zvake, kana kuti muJefune, kana zvipi hazvo, anogona kipiwa ropa rake rikaiswa mutsinga dzake, nekuti tose tiri veropa rimwechete. Ruvara rweganda redu, kana kwatinobva, hazvinei nenyaya yacho.

Asi patakasarurwa, ndeapo patacabuda munezvenyika, zvazvakaita vaIsraeri pavakabudiswa kubva Ijipita Naye. Ndipo patakasarurwa kubva muzvinhu zvenyika.

61 Zvino, kune vanhu vorudzi rwaHamu, rwaShemu, uyewo rwaJafeti. Uye dai taiva nenguva yekuti tironde zvizvarwa izvi kuenda kumashure, waizoona kuti vanhu veganda jena vari vechirungu ava, kuti vakabvepi. Zvino, aiva muJudha uyu . . . MuSamariya, aiva musanganiswa wemhando yemuJudha nemuHedheni, vaya vakaroorana navaHedheni pakuita kwaBalaam, uye Mowabi. Vanhu ava vainzi vaSamariya. Uye kwaiva navaJudha navaHedheni.

Zvino, isu rudzi rwechirungu takanga tisinei nechokuita pamusoro pazvo. Takanga tisingatendi mune ZvaMesiya, kana zvime zvakadaro. Takanga tisinga tarisiri kuuya Kwake. Takazopinzwa mazviri gare-gare.

Jesu Akaye kune vari Vake, uyewo vari Vake ava havana kuMugamuchira. Uye Iye Akati kuvadzidzi Vake, "Musaenda kunzvimbo dzavaHedheni, asi endai ikoko kumakwai akarasika eIsraeri." Uye Iye Akaenda bedzi kumakwai akarasika eIsraeri. Uye tarisai, Akazviratidza Pachake ipapo SeMwanakomana womunhu, mberi kwavaJudha. VakaMuramba Iye.

Zvino, vaSamariya, vari musanganiswa womuJudha nomuHedheni, vaitendawo zvakare, uyewo vainege vakatarisira kuuya KwaMesiya.

Isu takanga tisina Tariro iyoyo. Taiva vaHedheni, takasenga tsvimbo kumisana yedu, tichinamata mipunzo; vaHedheni.

62 Asi zvino nerimwe zuva, Johani chitsauko 4, Iye Aifanira kuenda Samariya, Ari munzira Yake kudzika Jeriko. Asi akakwidza nekuSamariya. Zvino Achiri kukwidza kuendako, Akagara pastime raiva kunze kweguta reSikeri. Uyewo tsime iri, kana wakamboendapo, raiva nokuonekwa kwakati kure sezzivzi. Uye pane chitibu chinocherwa navanhu vose, chemvura, apo pavanouya vose. Uye mudzimai anouya ipapo mangwanani, kuzozadza zvirongo zvavo nemvura, uye vochidengezera nomusoro, chimwe vochigadza pahudyu dzavo dzose, uye vofamba nazvo zvose vakatwasuka nokukwanisa kwose, vasina kana donhwe ravanoteura; vachitaura nyaya dzavo. Saka, vaizo, vanhu vaiuya kunze ikoko.

Saka nomusi uyu nguva dzaiva dzichinge dzinova dzegumi neimwechete dzezuva. Saka Iye Akatuma vadzidzi vake kuenda muguta, kunotenga zvokudya, chikafu. Uye vakati vaenda . . .

63 Paiva nomudzimai akange aine hunhu hwakaipa. Tingamudaidza tichiti, muzuva ranhasi, mudzimai wemudzimba dzoupfeve, kana kuti pfambi. Akava navarumwe vakawanda. Zvino Jesu Akati Agere ipapo, mudzimai uyu akauya panguva dzingava dzegumi neimwe yezuva. Mazviona, akanga asingagoni kuuya munguva imwechete yamangwanani yaiuya mhandara kuzochera mvura yokuwachisa; aitofanira kumirira dakara vose . . . Vakanga vasinga wirirani naye sokuwirirana kwavaiita pachavo. Mudzimai uyu akanga akavengwa. Saka ipapo, akauya kuzocherawomvura, saka akatora gashu rakarukwa iri, ndokurembedza chirongo chake pariri, uye ndokutanga kuchidzikisa chirongo chichipinga mutsimwe.

Mudzimai iyu akanzwa Mumwe Munhu achiti, "Mudzimai iwe, Ndipewo mvura yokunwa." Zvino murangarire, kuti NdiMerikizedheki Uyu. NdiJesu Uyu, zuro, Iye Mwanakomana womunhu. Uye akatarira kwose-kwose, uyewo ndokuona muJudha. Saka iye akabva ati, "Chamngamire, hazvina kunaka kuti muJudha akumbire chinhu kubva kumuSamariya, naizvozvo Mataura Musiri munzvimbo Yenu. Manga musingafaniri kundikumbira chinhu chakadaro. Hatidyidzani."

Iye Ndokuti, "Asi dai waiziva Munhu wauri kutaura Naye, ungadai waNdiKumbira Ini mvura yokunwa."

Mudzimai uyu ndokuti, "Mungaichera sei mvura yacho? Tsime iri rakadzika, uyewo Imi Hamuna chokucheresa."

Iye Akati, "Mvura iyo yaNdinopa Ini Imvura YoHupenyu, inotubuka ichikwidza kupinda MuHupenyu Hwusingaperi."

Akaramba Achitaura naye kusvikira Aona chinhando chake. Uyewo ipapo pane . . . Mutarire zvino zvaAkatura kwaari zvino, "Enda unotora murume wako uye uuye naye pano."

Uye mudzimai uyu ndokuti, "Handina murume."

Iye Akati, "Wataura chokwadi, nekuti wakambova navamwe vashanu, uye wauri kugara naye ikozvino haasi wako. Saka, muchinhu ichi, wataura chokwadi."

Tarirai muone mutsauko waivapo pakati pomudzimai uyu neboko ravaprista. Mudzimai uyu aiziva zvizhinji ZvaMwari kudarika boka rose ravaprista, vabatanidzwa pamwechete.

64 Mudzimai uyu ndokuti, "Chanagmire, ndinoona kuti Imi Muri Muporofita." Iye ndokuti, "Hatina kuva kana noumwechete mumakore mazana mana apfuura. Zvino, tinozviviza kuti Mesiya Ari kuuya. Uyewo kana Mesiya Auya, Achaita zvimechete zvaMaita izvi." Ndicho chaiva chiratidzo ChaMesiya, nekuti Iye Akanga Ari Mwankomana womunhu. Ndokuti, "Ndizvo chaizvo zvaAchaita paAnouya Iye. Munofanira kunge muri muporofita Wake."

Iye Ndokuti, "Ndini Iye." Hakuna kana nomunhu aigona kutara saizvozvo.

Mudzimai uyu akakandira pasi chirongo chemvura uye ndokumhanyira muguta, uye ndokuti, "Huyai, muone Murume Uyo Andiudza zvandakaita. Haasiye here Mesiye?"

Zvino murangarire, Iye Akavimbisa kuita chinhu chimwechecho kumagumo erudzi rwavaHedheni.

VaJudha vakava namakore zviuru zvina zvokutarisira Mesiya, makore mazana mana vachidzidzisa pamusoro pokuuya Kwake, uyewo nezvaAizoita kana Achinge Auya, asi vakakundikana kuMuona Iye, kana kuti havana kugona kuzviziva. Uyewo PaAkaita kuti Ave Anozivikanwa maringe nezviga zveBhaibheri nenzira YaAkatura kuti Aizovzivivisa, PaAkange Ari mutumbi WeShoko uye nepaAkava nyama uyewo Ndokugara pakati pavo, vakakundikana kuzviona uye vakati Mabasa Ake aiva adhiyabhoi.

65 Zvino isu takawana makore zviuru zviviri ekudzidzisa, zvichidzika nokupfuura nekereke yeKatorike, mushure mavapostora. Zvino tinodzika nokudarika nemukereke yeKatorike, kupinda nomuvaGreek, uye nevamwe, ndokudzika tichipinda muchizvarwa chaLuther, uyewo necha Wesley, nezvakawanda-wanda, ndokudzika nemumasangano mazana mapfumbamwe. Vaiva nezvizarwa zvose izvi, vachidzidzisa.

Zvino Iye Akavimbisa, munguva idzo kuguma kwenguva kusati kwakkana, kuti munzaniso weSodhoma neGomora waizovapo, "Sezvazvakanga zvirimumazuva eSodhoma, ndizvo zvazvichava panguva yokuuya kwenguva yokuguma, Mwanakomana womunhu Achazvizarura Iye Pachake zvakare." [Tepi inonyarara-Ed.]

"Asi kwechinguva nyika haizoNdionizve; asi imi muchaNdiona, nekuti Ini," zvinoreva munhu iyeye pachake, "Ndichava nemi, kunyangwe mamuri, kusvika pakuguma, kuguma kwenyika. Ini Ndichava nemi." Iye Ndiye mumwechete zuro, nhasi, nokusingaperi. Mazviona?

Mazviona, muSamariya aiva, chaizvo-izvo, kubva mumharidzo yanezuro Manheru, aiva Hagari, maona, mhando yakashonyororwa. MuJudha aiva Sarah, kana kuti Sara-hite. Asi muHedheni unobva kuna Mariya, iyo Mbeu YoUmambo, Mbeu YoUmambo yaAbhurahama.

66 Zvino zvakavimbisa kuti mumazuva ano okugumisira, kuti Mwari Mumwechete Uyu, Kristu Mumwechete Uyu, Aizodzokazve pano uye ozvizarura zvakare Iye Pachake SeMwanakomana womunhu.

Nemhaka yei? Iye Ndiye mumwechete zuro, nhasi, nokusingaperi. Uye kana Iye Asina kurega vaJudha ava vachienderera mberi saizvozvo, uye Iye Akavapa chiratidzo ChaMesiya, uye Iye Ozouya kuno kumagumo enguva dzavaHedheni vachidzidzisa havo fundho dzeBhaibheri, Ovarega vapinde vachiita saizvozvo, Anozova Asinga enzanisiri zvinhu. Anofanira kuti Aite chinhu chimwechecho, nekuti Bhaibheri Rakati, muna . . . VaHebheru chitsauko 13 ndima 8, "Iye Ndiye mumwechete."

Uyewo Akavimbisa muna Maraki chitsauko 4, uyewo nemamwe maGwaro akasiyana-siyana, kuti, mumazuva okuguma, kereke ichange iri muchinhanho chairi nhasi, uyewo zvimechete nenyika.

Tarirai zviri nyika nhasi. Mutarire chinhando ichi cheSodhoma. Mutarire kundengendeka kwenyika munzvimbos dzakasiyana-siyana, uyewo nezvinhu zviri kuitika. Tarirai zviri kereke uye nematope ari mairi, eBhabhironi. Tarirai muone mutumwa akatumwa kwairi, Oral Roberts naBilly Graham.

G-r-a-h-a-m, kekutanga katava nenhume, inotumwa kumakereke ose, yakava nezita rinopera nokuti h-a-m, sezviva zita raAbhurahama. A-b-r-a-h-a-m mavara manomwe. G-r-a-h-a-m mavara matanhatu. Akanangepi? Kune nyika. Nhamba iyi yechitanhatu inoreva munhu. Munhu akasikwa muzuva rechitanhatu. Asi nhamba yechinomwe inotaura Mwari.

67 Zvino vatarirei vari zasi uko muSodhoma. Uye hedzo nhume dzavo zasi ikoko dzichitaura navo. Asi ipapo Mbeu YoUmambo yaAbhurahama iripi? Chiratidzo chavo chiripi, icho Akatura nezvacho? "Sezvazvakanga zviri mumazuva eSodhoma," mukuti Mwari Akaburuka uyewo Akaratidzwa munyama yomunhu, uye Akataura nezve zviinhu zvafungwa seri mumoyo waSarah, aiva mutendhe raiva seri Kwake, chiratidzo chokugumisira nyika yavaHedheni isati yaparadzwa nomoto uye nehasha DzaMwari. Munozvitenda here izvi? [Ungano inoti "Ameni."-Ed]

Merkizedeki uyu aive nyama, aizvimiririra mumutumbi wemunhu; zvino akazoitwa munhu wenyama. Uye zvino, manheru ano, Ndiye mumwe chete, zuro, nhasi, nokusingaperi. Munozvitenda here?

Anova Ndiye Merikizedheki Uyu, zvino, Anova mumwechete zuro, nhasi . . . HaAna kumbova nababa, kana kumbova naamai; Iye HaAna kumbova namavambo amazuva, Iye HaAna kumbova namagumo ohupenyu." Uyewo Iye Akasangana naAbhurahama, uyewo Iye Akaratidza chiratidzo chipi? Zvino PaAkazova nyama, Iye Akatura Akati chinodzokororwazve kana nguva dzokuguma dzokwana. Munozvitenda here izvi? [Ungano inoti "Ameni."-Ed.] Ini ndinozvitenda. ["Ameni."]

Ngatinamatei.

68 Mwari Anodikanwa, ndinotenda maGwaro, kuti Imi Makati Muri "Mumwechete zuro, nhasi, nokusingaperi." Uye nokurevesa kwose kwomoyo wangu, Ishe, ndinozviziva chiripo chimwe chinhu chagadzirira kuitika. Handikwanisi kunyatso donongodza nezvacho. Ndinotya kutaura chinhu pamusoropazvo, Ishe. Imi Munoziva zviri moyo womuranda Wenyu.

Uyewo kuti rungani, muzvizvarwa zvose zvapfuura rwaMatumira zvinhu, uye vanhu vakakundika kuzviona. Munhu anogara achirumbidza Mwari nguva dzose nokuda kwezvaMakaita, uyewo vachitaura pamusoro pezvinhu zvikuru zvaMuchaita, asi achifuratira zvaMurikuita ikozvino. Ndizvo zvazvava muchizvarwa chapfuura. Nemhaka yei kereke yeKatorike yakakundika kuona kuti Mutsvene Patrick somuporofita WaMwari? Nemhaka yei vakauraya Joan weku-Arc asi mudzimai uyu ari mu-muporofitakadzi, vakamupisa somuroyi? Baba, zvagara vanotarira munhoroonda. Imi munozvivanza kumeso avakachenjera uye vakangwara. Chikonzero Imi Makati kuvaprista ava, "Munokwenenzvera mabwiro avaporofita, asi muriimi makavaisamo." Mushure mokunge vaenda, vanozosara voona mhosho dzavo. Nguva dzose vanogara vachiKutambudzai, Ishe, zvisinei nekuti Mauya Muri muchimiro chipi.

69 Ndinonamata, Manheru ano, Mwari, kamwechete zvakare. Mangwana takaronga kuti tinge tiri . . . kuti tiende kuTucson. Dzimwe nzvimbo idzi dzenyika, mamwewo maguta atinofanira kunoparidza maari. Asi, Mwari Anodikanwa, panogona kunge paine vatsva pano Manheru ano avo vasati va . . . Vanzwa MaShoko Achiparidzwa, asi vasati vambozviona Achiratidzwa.

Sokukumbira kwandaita KwaMuri pokutanga. Apo vadzidzi vaya, Kiropasi uye neshamwari yake, vachibva Emausi, vachifamba nomugwagwa, uyewo Imi Mukabuda nomumakwenzi uye Mukatanga kutaura navo, mushure mokumuka Kwenyu, Mukavaparidzira. Sei, Imi Mukati, "Mapenzi, anemoyo inonokera zvinhu. Hamuzivi here kuti Kristu Unofanira kutamburira zvinhu izvi, mushure mezvo Opinda mukubwinya Kwake?" Asi kunyangwe zvakadaro havana kugona kuzviona. Kwemuswere wose vakafamba pamwechete Nemi, asi kunyangwe zvakadaro havana kugona kuziva kuti Ndimi. Asi noumwe usiku . . .

Kwakati kwavira, vaka Kukugomedzerai Imi kuti Mupinde muimba yavo. Ipapo vakati vapinda mukamba kaduku kukugara uye masuwo ose avharwa, ipapo Imi Mune chimwechinhu chaMakaita nenzira imwechete yaMakachiita nacho Musati Marovererwa, uye vakabva vazviona kuti Aiva Kristu Amuka. Nenguva isipi Makanga Mava seri kwechidzitiro uye Maenda. Nokukurumidza vakamhanya uye vakandoudza vadzidzi, "Ishe zvirokwazvo Amuka!"

Baba, Mwari, ndinozvitenda kuti Imi Muchiri Mupenu. Ndinozviziva Muri Mupenu. Uyewo Makazviratidza izvi kakawandisa. Madii Mazvidzokorodzazve kwatiri zvakare. Ndiri muranda wenyu; avawo varimuno varandawo Venyu. Ishe, kuitira kuti vanhu ava vagoziva kuti ndavaudza Chokwadi? Ngazviitwe, Mwari. Ndinozvikumbira MuZita RaJesu, kamwechete aka zvakare. Ameni.

70 Zvino, handikuzivei. Ndinoziva vamwe. Mukomana agere apa uyu ndinomuziva. Bill Dauch agere apo ndinomuziva. Ndinoda ku . . . Heino Hama Blair, Rodney Cox. Zvakaoma kuona zvirikoko uko.

Kurutivi rwekuku urwu, ikozvino handina kana noumwechete wandirikuona, pachokwadi, wandingagona kuziva.

Zvino vangani venyu muno vanoziva kuti hatisati tamboonana? Simudzai ruokorwenyu, anoziva kuti handina chandinoziva pamusoro poupenyu hwake, simudzai maoko enyu kumativi ose.

Vangani muno vane chirikuvanetsa, kana chinhu icho chaunoziva kuti handina ruzivo nezvacho? Mungasimudza here maoko enyu.

Zvino, hazvigoni zvachose, hazvigoni zvachose kuti inindizive chinhu chipi zvacho pamusoro pako. Kana kuti, kana zvadaro, ndinenge ndaziviswa nokuzarura KwaMweya.

Iye zvichiitika kuti ndakuudzai husiku hwose uhwu hwakapfuura, uyewo manheru ano, kuti Iye HaAna kufa; Iye Aripano, uye Akavimbisa kuita chinhu chimwechecho. Uyewo Akavimbisa kuti ichasvika nguva iyo mumazuva okugumisira, maringe naMaraki chitsauko 4 uyewo maringe naRuka, kuti Iye Aizoonekwazve Ari muchimiro chomunhu pakati pavanhu Vake uyewo Iye Oita zvinhu zvimechechezvo, uye nokuzozarura chinhu chimwechetecho, chiratidzo chimwechetecho ChaMesiya. Vangani vanozviziva kuti, imi vanoverenga Bhaibheri, vanoziva kuti Ichi Ichokwadi? Itai kuti, "Ameni." [Ungano inoti "Ameni." -Ed.] Mose munofanira kunge muri vaverengi veBhaibheri.

Zvino, ndinozviziva kuti hazvisi zvakajairika kuvanhu nhasi, asi zvakadaro Ichokwadi. Ndicho chikonzero vakakundikana kuziva Jesu weNazarea. Vaiziva bedzi dzidziso dzemakereke avo, asi havana kugona kuMuziva Iye. Asi Iye Akauya nenzira yakarehwa neBhaibheri; kwete yevafundhi veBhaibheri, kwete yomuprista. Iue akauya SoMuporofita, uye veKwake havana kugona kuMugamuchira Iye.

71 Zvino, kana Mwari Achichengeta Shoko Rake, uye kana ini ndika . . . kana zvikaitika kuti zvawirawo panemunhu wandinoziva, ipapo ndicha-ndichatora mumwe. Maona, ndirikuda mumwe munhu wandisingazivi. Uyewo ndinoda kuti muve mumunamato.

Zvino, mutarire, pakava nomumwe mudzimai muduku aiva nourwere. Akanga ashandisa mari yake mukuenda kumachiremba; havana chavakagona kumubatsira nacho. Uyewo mudzimai uyundokuti nechromumoyo make, "Kna ndikagona kubata hanzu YoMurume Uyu, ndinoporeswa." Munorangarira here rungano urwu? Uyewo vose vakaedza kuti vamudzivise agarire kure, asi iye wakamanikidza nzira yake dakara andobata hanzu Yake, ndokudzokera uye ndokugara hake pasi.

Zvino nyatsoteerera. Uyewo ipapo Iye PaAkadaro, mudzimai uyu paakadaro, Jesu Akatendeuka Ndokuti, "Ndianiko aNdibata?"

Naizvozvo, Petro muapostora akaMutsiura. Anogaona kuva akataura chimwechinu sezvizvi, "Ishe, regai kutaura Muchidaro. Vanhu vanozotenda kuti pane chisina kumira zvakanaka Nemi. Nekuti, paya PaMakavati vadye nyama Yenu nokunwa Ropa Renyu, vakabva vagara vafunga kuti pane chisina kumira zvakanaka Nemi. Uye Imi Murikuti, 'Ndianiko aNdibata?' Nemhaka yei, Imi Muchiona kuti mhomho yose iyi iri ku-kubatai Imi."

Iye Ndokuti, "Hongu, asi Ndinoona kuti simba RaMwari rabuda Mandiri." Mubatiro uyu wakanga uine mutsauko. Zvino, ani naani zvake anoziva kuti simba RaMwari "isimba romuviri." "Ndanzwa kurukutika; simba RaMwari rabuda maNdiri."

Uyewo Iye Akatarira kwose-kwose muungano iyi kusvikira Akaona mudzimai muduku uyu, uye Ndokumuudza nezve dambudziko rake rokubuda ropa. Uyewo mudzimai uyu akanzwa mumuviri make kuti dambudziko iri rokubada ropa rakange rapera. Ndizvo here? Uyewo Iye Akati, "Kutenda kwako kwakuponesa."

Zvino, shoko iri mururimi rwechiGreek rinoti sozo, rimoreva "kuponesa" zvachose, panyama napamweya, zvakangofanana. Iye "Akaponesa." Iye Ndiye-Ndiye Muponesi wako.

72 Zvino, kana Aiva Mumwechete nezuro, uyewo nenzira yaAkazvibata nayo, kuratidza kuti Aiva pakati pavanhu, Iye Mesiya Akavimbisa; uyewo iriyo nzira yaAkazviratidza nayo Iye Pachake, uyewo yakavimbisa neBhaibheri, Anozoita zvinhu zvimechechezvo ikozvino; haAngadaro here, haAngaiti here chinhu chimwechetecho?

Imi moti, "Iye Akataura here zvekupodzwa kwavarwere?" Hongu!

KuVaHebheru, muBhaibheri mandaverenga kubva, kunonzi, "Jesu Kristu ikozvino Ndiye Muprista Mukuru Anobatikana namanzwiro ekurwara kwedu." Vangana vanozviziva kuti ichokwadi? [Ungano inoti "Ameni." - Ed.] Bhaibheri Rakazvitura. "Ndiye Muprista Mukuru Anobatikana namanzwiro ekurwara kwedu." Zvino kana Iye Ariye Muprista Mukuru Mumwecheteyo sezvaAiva kare, ko Anozozvibata nomubatiro upi nhasi? Anofanirwa kuZvibata nomubatiro mumwechete waAkaita kare, kana Iye Ariye Muprista Mumwecheteyo. Zvino, munogona kufunga . . .

Ini handisini Muprista Mukuru wenyu. Munogona kubata ini, uyewo zvinozofanana nokubata kwaungaita murume wako, kana mukoma wako, kana chipi nechipi, angori munhu.

73 Asi rega kutenda kwakokubate Iye, ipapo chitarira zvinozoitika.

Zvino, kana ini ndiri muranda WaMwari uyewo ndakuudzai Chokwadi, Mwari Anozvisimbisa kuti

Ichokwadi. Uyewo zvinozoratidza kuti Jesu mupenu Manheru ano, Amire pano. Ndizvo here? [Ungano inoti "Ameni." -Ed.]

Zvino, imi chivai nokutenda bedzi, rutivi rwumwechete panguva imwechete, retivi rwumwechete. Ivai nokutenda ikoko. Zvirinani ndigare pamuchina uno wokutura nawo pano, nekuti havasi kundinzwa.

Mumwe munhu ngaatarise Kuna Mwari, uyewo oti, "Mwari, murume uyo haandizivi. Haana kana chimwe chaanoziva pamusoro pangu. Handisati ndamboonana naye zvachose. Asi tenderai kutenda kwangu kubate Imi, Ishe. Uyewo Imi Munoziva dambudzikorangu, Ishe. Imi Munoziva zvose pamusoro pangu. Munoziva zvandiri, sokuziva KwaMakaita Petro kuti aiva ani, sokuzivawo KwaMakaita Nataniyeri, sokuzivawo KwaMakaita dambudzikoromudzimai uya wekubuda ropa. Uyewo murume uyu anondiudza kuti Imi 'Ndimi Mumwechete zuro, nhasi, nokusingaperi.' Zvino, Ishe, tenderai kutenda kwangu kubate Imi."

Zvino kana Iye Akaita saizvozvo, uyewo oZviratidza Iye Pachake zvisingakundiki pano, vangani venyu vanozotenda MaAri nemoyo yavo yose; kana Iye Akazviitira kumunhu mumwechete, kana vaviri, kana vanhu vatatu, kuitira cha-chapupu? [Ungano inoti "Ameni." - Ed.] Mwari Akuropafadzei.

74 Zvino, Mwari Baba, izvi hazvichazi zvachose mumaoko omunhu upi zvake. Chinofanira kuva chiitiko chinoshamisa chomweya. Saka ndinonamata kuti Imi Mundibatsire zvino, Ishe. Ndava mumawoko Enyu. Itai zvaMunoda nen. MuZita RaJesu. Ameni.

Zvino, musatya henyu. Mukuzvininipisa, mukuremekedza ingoti, "Ishe, Ndichashumira Imi. Uyewo chichava chokwadi, kuti, kana ndikabata hanzu Yenu, ipapo Imi Muchatura kwandiri kuburikidza nomurume uyo. Izvozvo zvichandiratidza kuti zvaanga achitaura Ichokwadi." Ndizvo here?

Vangani venyu vakaona mufananidza WeChiedza Icho? Wakaenda kwose-kwose munyika ino, kwose zvako. Sciene yakautora uye ndokuuongororora, uye nokumwe kwose. Zvino, Iye Avapano ikozvino; Mumwechete Uya Ataura pamusoro poKuroorana Uye Kurambana, Mumwecheteeye zasi uko kurwizi muna '33, Mumwechete zuro, nhasi nokusingaperi. Iye Ndiye Mumwechete.

75 Zvino, pane mudzimai, uyewo azvicherechedza ikozvino kuti pane chimwe chinhu chaitika. Chiedza Ichi Chakamira pamusoro pomudzimai uyo. Mudzimai uyu akagara apa, akapfeka sikipa yeruvara rwegirini, kana chimwe chakadaro. Mudzimai uyu handimuzivi. Ndinotenda kuti hatisati tamboonana. Ndizvo chaizvo. Hamuzvitendi here kuti Mwari . . . Une-une chikumbiro chechimwe chinhu, uyewo iwe unozvitenda herekuti Mwari Anondizarurira dambudzikorako? Uyewo kana Iye Akaita sokudaro, ipapo uchaziva kuti rinofanira kuva simba romweya, nekuti ini handikuzivi. Uyewo izvi zvinofanira kuunzwa nechomweya.

Zvakazorora pakufunga kwako kuti chimbori chii. Unogona kutora hako rutivi navaprista, wozvidaidza kuti, "ndeza dhiyabgori," kana kuti wotora rutivi rwomutendi uye wozvidaidza kuti "NdiMwari." Nzira ipi zvayo yaunozvitenda nayo, ndiko kunobvawo mubayiro wako.

Kana Mwari Akandizarurira dambudzikorako, unoMugamuchira here Iye kuti Ndiye anopedza dambudzikorako? Ini dambudzikorako handirizivi. Asi ndiri kuzviziva, uye iwe uri kuzviziva, kuti pane chirikuitika.

Zvino, zvino rega ndikuudze manzwiro auri kuita, uye ipapo uchazviziva; manzwiro akanaka, anotapira, anekuzorodza maari. Ndakatotarira ipo chaipo PaChiri. Ndicho Chiedza Icho, Chine ruvara rwe-Amber Chiri pamusoro pomudzimai uyo.

Uye mudzimai uyu arikutambudza nedambudzikoromudumbu. Mune zvakaita samapundu, zvakada kuudaro, mudumbu make. Mudzimai uyu haasi wemuno. [Hanzvadzi iyi inoti "Ndizvo."] Kwete. Unobva kure nenzvimbo ino handizvo here? Ndizvozvo chaizvo. Unobva kuWisconsin. Ndizvo here? Chokwadi. Zvino wapodzwa. Kutenda kwako kwakuporesa.

Zvino imi chindiudzai kuti Ndiani abatwa nomudzimai uyo? Ndimire chinhambwe chinosvika mayadhi makumimaviri namashanu kubva paari mudzimai uyo. Mudzimai uyu abata Ishe Jesu Kristu, Iye Muprista Mukuru. Munozvitenda here? [Ungano inoti "Ameni." -Ed]

76 Ndakatarisa mudzimai uyo wandambotaura naye. Mudzimai uyu, ndakatarisa paari nokuti arikunamata kwazvo achinamatira mumwe murume. Mudzimai uyu andiudza kuti pane umwe murume . . . Haana chaakandiudza nezvazvo.

Asi zita rake ndi Amai Waldrop. Anobva kuPhoenix. Akamutswa kubva kuvakafa, uye chiremba wake akauya nemifananidzo zviri nhengo dzomutumbi uye yairatidza gomarara remoyo. Mudzimai uyu akafira mumutsara wokunamatirwa. Zvaane nguva yakadii zvaitika, Amai Waldrop? Makore gumi namasere apfuura, uye havo vagere apo manheru ano, chapupu chinorarama. Chiremba womudzimai uyu akauya kumusangano, ndokuunza mu . . . Ndokuti, "Mudzimai uyu angararama sei?" Asi hezvo aripapo uyo, uye asina kana zvingaratidza hurwera ihwohwo.

Mudzimai uyu auya noumwe munhu, uye ari kumunamatira. Zvino, murume uyu avakufa, neshuga. Zvino, izvi ndanga ndichiviziva. Asi nokuda kwokuti muri kunamata . . . Munozviziva kuti handizivi zita rake murume uyu, Amai Waldrop.

Anobva ku Missouri, uye zita rake ndi VaCooper. Ndizvozvo. Zvino, imi chitendai, dzokerai henuy kumba uye mupore, changamire. Zviri kwamuri, kana muchizvitenda.

77 Heuno mumwe mudzimai, arikunetseka nechirwere chemumapapu, kunetseka kufema. Haabvi munzvimbo ino. Akagara mukati umo mumhomho, neche uko chaiko. Ndinovimba anowana . . . Haabvi munzvimbo ino. Anobva ku Georgia. Muzvare Mckenny. Munozvitenda here nemoyo wenyu wose, uye munotenda here kuti Mwari Anokupodzai? Simukai mumire netsoka dzenyu, kana tisingazivani uye kana chiru chokwadi. Jesu Kristu akupodzai. Munozvitenda here?

[Hama Branham vanofuratira ungano-Ed.]

Kumashure kwangu, kune murume akagara seri kwangu. Abatana NaMwari. Uyewo arikushuvira; murume uyu anemwana mucheche anedambudzoko romoyo. Uye mwana mucheche uyu anekaruzha kanoitwa nemoyo wake, ndizvo zvakataura chiremba. Uye zita romurume uyu ndi VaCox. Simukai, VaCox. "Uye Iye Akaudza Sarah zvaifungwa nehana yake, ari seri Kwake."

[Hama Branham vanoenderera mberi vakafuratira ungano-Ed.]

Mhiri uko kwepanofamba navantu muno kubva pavari, nechekumashure zvishoma, pane murume asingabvi munzvimbo ino, asi anobva ku New Mexico. Handisati ndamboluona murume uyu, muhupenyu hwangu. Ndakamutarira ikozvino, asi iye ndakamufuratira. Anobva ku New Mexico. Uye murume uyu ane musikana waanoda, uye musikana uyu ane chisina kumira zvakana nomuromo wake. Ane . . . Buri repamuromo ndiro dambudziko rake. Uye zita romurume uyu ndi VaWest. Mungasimuka here, changamire. Handizivani navo zvachose, asi Ishe Achapodza mwana wavo.

78 Munotenda here ikozvino nemoyo yenu yose? [Ungano inoti "Ameni."-Ed.]

Vangani venyu vavakutenda zvinonemoyo yava yose? ["Ameni."] Zvino, handizvo here kuti Jesu Kristu Ndiye mumwechete zuro, nhasi nokusingaperi? ["Ameni."] MunozMugamuchira here zvino SoMuponesi wenyu? Simudzai ruoko rwenyu. ["Ameni."] Munotenda here MaAri kuti Ndiye Mupodzi wenyu? ["Ameni."]

Hapano, pano apa pane munhu agere pano, akaremara kana kuti chimwe chinhu, akavata panhowo. Murikundinwa here kuburikidza nomuchina uyu wokautaura nawo? [Hama Branham vanotora muchina uyu uye vofamba kuenda panoperera nzvimbo yokuparidzira uye votaura nomudzimai avete panhowo-Ed.] Handikuzivi. Ungori mudzimai avete apa. Dai ndaiwanisa kukupodza, ndaizoita saizvozvo. Ini handikwanisi kukupodza.

[Umwe murume anotanga kuungudza-Ed.] Zvakana. Anongova murume arikufara. Mwana wake murume uyu apodzwa.

Handikuzivi. Iwe ungoriwo mumwe mudzimai, uye ini ndingoriwo mumwe murume. Ndiko kekutanga kuonana muhupenyu, ndinotenda kudaro. Vanhu ava . . . ? . . . vakuunza pano. Zvechokwadi, ndiko kekutanga kako kuuya pano; vachangobva kukuunza muno. Wabva kure kwazvo. Wakaputirwa nomumvuri worufu. Une gomarara. Hakusi kuremara. Igomarara. Machiremba haachina zvihinji zvavangakuitira. Ichokwadi. Uye une chokwadi kuti wava kufa; machiremba haachina zvihinji zvavanga kuitira.

Pane imwe nguva kwaiva navatatu vaiva namaperembudzi vaigara pasuwo reSamariya. Uye vemaperembudzi ava vakati, "Ko tinogarei hedu pano dakara tafa?" Nekuti, kwaiva nourwere, kufa nenzara, uye nokudya vana vounwe noumwe. Ivo ndokuti, "Kana tikadzika kuenda kumusasa womuvengi, ivo vaSiriya; kana vakatiuraya, tichangofa, zvakadaro. Asi kana vakatinunura, ticharamara." Uye ndokutora mukana uyu. Uyewo, kuburikidza nokutenda, havana kuzvinunura ivo voga asi boka rose zvaro.

Zvino, uchafa kana ukaramba uvete apa. Asi hausi kunzi iwe uende kumusas uya wavakaenda. Asi urukukwya kuimba YaBaba, . . . ? . . .

79 Wavakufa negomarara. Haugoni kurarama kunze KwaMwari. Haubvi muguta rino. Haubvi munharaunda ino. Wabva kure kwazvo. Iwe unobva ku Milwaukee. Ichokwadi. Ndizvozvo. Ndariona guta iri. Ndinoriziva. Ndizvozvo.

Unotenda here? Unogamuchira Mwari here SoMupodzi wako? Kana uchidaro, hazvina basa kuti unekuperezeka kwakadii, kana kuva asingagoni kubva panhowo yake zvakadii, ndinotenda kuti, dai ndaiva muchinhanho chako, ndaisimuka NeZita RaJesu Kristu. Uye ndotora nhovo yangundoenda kumba, uye ndonorarama kuitira kurumbidzwa KwaMwari. Unganditeerera here, semuporofita WaMwari? Zvino

chisimuka uende, uye upore. Upore! Usatya hako. Simuka kubva panhowo iyi; Mwari Anokupodza. Waona?

Mumwe munhu amubate kuti asimuke uye kuti awane simba. Unotenda MuNaMwari here? Regai awane simba; achaita zvakanaka. Ndizvozvo, vahanzvadzi. Heuno mudzimai uyu, NeZita RaIshe Jesu Kristu! [Ungano inopembera apo hanzvadzi iyi yamira zvino.] Ngatisimukei uye tipe mbiri Kuna Mwari. Iye Ndiye mumwechete zuro, nhasi nokusingaperi! [Ungano inopembera zvikuru uye nokupa mbiri Kuna Mwari-Ed.] Enda hako, uye Ishe Jesu Kristu Akuropafadze. [Ungano inoenderera nokupembera zvikuru uye nokupa mbiri Kuna Mwari-Ed.]



www.messagehub.info

Mharidzo Na

William Marrion Branham

"... mumazuva eShoko ..." Zvak. 10:7